



15  
1301  
16



門 5  
號 1301  
卷 16

唐文拾遺卷之五十一

榮祿大夫三品頂戴前分巡廣東高廉道加四級臣陸心源輯

元質

元質垂拱中人失姓

八都壇神君實錄

昔唐堯氏作奄有冀方晉卿族興裂為趙國

字 缺十祠宮跨南垂而臨北際業希舊時古木十圍道

亞仙公幽靈八座精義而入相兆於儀形妙物

八都壇者都望八山之始壇也此地名山封龍之類

有八因壇立廟遂為號焉親親之道或謂昆季則檀

昭和十一年  
二月十四日  
購求

缺三 如桂有叢連蜷偃蹇于庭之畔方丈之地八樹  
星羅閒踈然見同氣長幼之象然而深根固本龍盤  
武據建殖時代人莫能知驗其磊落多古殆萬年也  
蓋棟宇未作靈祇之所憑焉氣色青忭狀煙霏兮霧  
籠馨香郁烈若蘭時子菜節左車降生之地休蔭弘  
多漢明載誕之城芳猷允塞豈徒川原之上祇稱明  
淨而已哉昔漢光和州將馮氏敬而不怠穀至兩錢  
感恩立銘盛績猶在自茲以後鮮或能繼雖明時聖  
日久屬昇平而旬雨谷風頃乖期候或蜚鳥荐出商  
羊屢舞顧畢昴之分野同壽春之東西九年之儲汲

汲於餽口萬人之眾敖敖以疚心獨我關亭不減平  
素匪惟神助亦在人弘弘之而誰可得言也時合蕭  
倓梁後□之幼孫陽羨公之愛子金陵地業夙著盛  
名玉樹時英少歸雅望禁巒祗寵期黑頭以爲公數  
奇不調將白首而作宰安此下人頌聲載路丞薛惟  
節曾祖暉列棘周代大父約剖竹皇家君之降生眾  
推必復青雲自遠貳翔鸞於斗城非罪而來助割雞  
於子邑主簿趙延慶體兒魁梧識度夷曠久而益敬  
芬若芝蘭仰之彌高邈如雲漢左尉司馬玄同器宇  
幽深學術該贍何思何慮運鬼謀於掌握玄之又玄

窮道源於脣吻此等官屬實曰循良辟人爲龍如鸞  
佐鳳聰明正直道合於神蘋蘩蘊藻感而必應井邑  
之地水旱無虞疆里之間稼穡獨茂甫田歲計家積  
千箱栖畝餘資周給壹郡就蒙福祐更表休徵嘉禾  
白鳩往往間出殊根會蒂示同心也雪羽霜毛旌潔  
白也酒食宴樂穆將愉予未央暉光日新鬱紛紜而  
何極隣城以之健羨臺府由其籍甚裡祀相望掃除  
不服刺史馮義故御史大夫安昌公之子也六藝俱  
學于何不長八體論功斯焉特妙褰帷露冕不墜家  
聲扶滯摧豪以爲已任下車未幾親行禮秩簠簋如

奠雲滿四郊舞詠未終澤洽千里司馬雲陳有清劭  
之才負邦國之譽非其不可所寄無憂嘗以龍見密  
雲逾積斲紆鶴履明德是歆曾不崇朝滂霈而返司  
法叅軍陳鼎量家保太正之道宦得于公之名俎豆  
之間知其可任其後微旱又令禱謁曲加獎旣顧走  
爲文不以人廢言亦應時流溢凡數齋告而屢有年  
八縣空倉壹朝重實皆可案覆而敢公言只如呼木  
扣藤沐蘭薦藻日有萬計願無壹違可得而聞不可  
得而說也神之隣里鄉黨列於碑陰者參十伍人並  
地望時雄耆年宿德每有邀福常所與祭荷明神之

重施欲古廟之增修閒伺農隙率先人願以垂拱元年十月一日依洪洞故事而興版築長垣百堵煙雲相連迴廊四注陰陽不測大廈中起巍然若扶幽邃窈窕不可談悉於是繪事入山署置叁面千巖萬壑宛在目前想宣父之名邱思啟母之爲石琢磨琬琰放象體勢方面列莖斑白有序光流聲殷之祉從此而歸骨青耳細之竒望之如在巖巖焉森森焉人莫敢視口周訪之能安寢乎事畢功弘旣而肯悅披文相質方議雕鏤忽有得神古碑有額無頌規矩裁製則光和碑之元偶也嗟乎人懷陵谷之慮兩地不孤

神知修復之期千齡繼出氣衝積雪慙如埋玉光照叢臺終同返璧宰君重其神應嗟玩久之謂今日抱璞俟時豈無人之別玉闕文有待蓋知來之如今其漢碑之建立也方伯馮公在位左尉樊君撰文此時也刺史又馮君居右局神意人事尔知之乎元質肆拾無間壹命而仕地孤鼎氣家累玉山承乏未寮名何足數雄文遠薦有覲於當仁吉事惟先不遑於覃思直書其事焉敢論文勒爲實錄樹之於右蕭公結構簡貴筆無妄得崇重明神敬恭繕寫鈎迴電轉金曜星繁庶以發揮幽明曠澈今古願八君保乂俾萬

代垂光名之揚子德之至神之來子此無愧土之安  
子岳之列若有人子斯不滅爲榮觀子□可閱石

張□

天授中人失名敬之之兄也

唐將仕郎張君墓誌銘 并序

君諱敬之字叔審功曹府君之第五子也耿介不羣  
文藻貫世年十一中書舍人王德本聞其俊材當時  
有□□制舉天下奇佚召與相見賦城上烏勒歸飛  
二字仍遣七步成篇君借書於手不盈跬息其詩曰  
靈臺自可依爰止竟何歸祇由城上冷故向日輪飛

王公嗟味乃推爲舉首文昌以其年幼第不入科以  
門蔭補成均生高第授將仕郎非其好也遂與諸  
兄紬按經史專以述作爲務唐咸亨四年七月十六  
日卒於家春秋廿五大周天授之三年正月六日改  
窆於安養縣西相城里君未及婚娶胤永絕著書  
無荷戟之童刻石闕鬻環之女執奠惟弟紀德乃兄  
撫擿操觚號咷橫集其辭曰

楊童不秀顏子未實妙跡叅微神機入室差爾貞懿

身高漢佚夢蛟翻紙雕龍散筆其陳車夜動馬帳晨

開議深白觀言窮紫臺禍徵斷石悲纏贈□道存金

素書留玉杯其二漾池東鷺驕山南拒燭乘埋隨連城

碎楚蕭颺風隧蒼茫月緒仲兮叔兮胡甯忍兮其三

張口

失名天寶中符陽縣尉員外置

杜昆吾石龕像銘 并序

金玉其相追琢其光以三昧之力成眾真之妙者郡

司馬杜公焉公名昆吾字景山後魏黃門侍郎始平

憲公之五代孫皇朝太僕卿之子衣冠弈葉詞翰縱

橫已万卷而成麟振六條而分虜口也為口謫宦于

斯歲次大泉獻缺四中部太守而至懿夫敬天之謹

不敢戲豫但缺五運更龕口山口像於仁口壁口口

清江下澈妙本口口如空際口相生於靜現水中口

夫口口則口人利遠則福成口之契缺五轉法輪於

金軛佩智印於缺三誰曰不然乃為銘曰

寶座層構睟容缺五江口月在水香風甘露缺四召

口口焉福口如是金石

口鄴

鄴長慶中鄉貢進士闕姓

阿九墓誌銘

皇光祿卿贈左散騎常侍順陽口口女字阿九年十

六口長慶三年十二月十九日口終于京兆口興里  
 太夫人河東縣君裴氏傷悼貞淑哀疚于懷口夫口  
 口情性內理剋口肅閨壺之儀曉組經之跡至美不  
 顯胡其鑒耶缺十口有垂缺口光之口其可勝哉  
 明年四月十一日窆於國之東隅白鹿原之別業鄮  
 奉高堂之命忍哀誌焉銘曰

口手裂心兮其痛何禁歛余之悲兮口口之深呼不  
 來兮思往莫得入九泉兮音姿悄默天不善善兮奈  
 何心悽怛兮口口淚濕栢根兮聲咽曠野一支長口  
 兮口墳之下石刻

口泌

泌元和中人闕姓

長安昭成寺尼塔銘

大唐元和元年三月十四日長安昭成寺尼大德三  
 乘行歸寂于義寧里之私第春秋七十九戒臘一十  
 九伏惟神兮俗姓姜氏望本天水以簪纓承繼家寄  
 兩都自頓駕長安貫移上國今則長安高陵人也故  
 中散大夫贈太子左贊善大夫執珪之女適昭陵令  
 贈通州刺史李昕之妻婦德自天毋儀生稟事君子  
 之門敬姜比德方擇隣之愛教母其明神儀惠和體



量疑肅有二子長曰誼終杭州餘杭縣令幼曰調終  
 温州安固縣尉有嗣孫五人定寅寓寧寔皆夙承嚴  
 訓克孝克忠或位崇百里之榮或再班黃綬之職神  
 兮自中年鍾移天之禍晚歲割餘杭之愛由是頓悟  
 空寂寞息禪林自貞元四年餘名於此寺嗚呼蓮宮  
 始構法棟斯摧定等哀慕悲號攀援何及以元和二  
 年二月八日敬奉靈輿歸窆于城南高陽原禮也白  
 日晝昏悲風慟起玄雲低壘上之野苦霧暗行轡之  
 衢芻靈已陳窆戶斯掩泌追承遺則泣而為銘勒石  
 紀文以永終譽其詞曰

神假温恭天資淑德無言成教有儀是則捨故里之  
 喧喧歸夜堂之寂寂朝雲出谷兮行雨散暮鳥悲鳴  
 兮去無跡流光西沒逝水東極閭泉壤兮千秋烈餘

薰於貞石石刻

李口

失名大中間宣州涇縣尉

遺德廟陲羅尼經幢記

漢明帝夢金人字缺九興字缺八歸心乃字缺九六根無字缺五  
 字八字缺三意字缺七永興俱入口口唐字缺八三字缺五皇  
 帝施字缺六審訛謬字缺八瑩淨口三寶口立口四字缺三

十力缺七 窺及無為缺六 有五大夫草市缺五 拱信

思者皇撫州缺三 與大清信弟子方少通缺五 斯道

塲建造隋羅尼缺四 績永缺四 泊我皇昭諭當缺四 勅折

毀自會昌五載缺六 未因再樹缺五 今有缺五 信弟子

方少通重新缺十 或濫缺五 舉首缺五 心證無為之

體助缺四 具列人名刊于貞石缺七 舊觀缺九 悟佛

一字 葉缺七 永缺四 不朽大中缺四 刻石

口廖

廖咸通中人失姓  
唐重修北巖院記

資中郡城缺 數百步之近有靈巖缺 蓋建中四缺 智

之所開劫也前缺 頂有寺曰缺 地之上方矣泊會昌

五歲詔缺 流有瀆其教而列刹缺 其制者大缺 留

一寺餘悉除去缺 巖缺 構皆缺 大中改元屢降缺

所缺 時郡邑申聞缺 茲巖勝境宜重興缺 陽

公以清淨化缺 心釋教無何夢中缺 補復前

規缺 右有所詣缺 果得其缺 滿前志缺

焉佳公薙草植木缺 建佛閣鍾樓齋厨惣一十三間

力缺 未周茅茨相半佳公以咸通六年七月奄缺

化滅其時前定邊節制大夫扶風公方莅茲郡以靈

卷五十二  
九  
巖絕境爲郡邑賞勝之地若非名德難副衆望沉吟  
精選遂辟開元寺高行僧元鼎住持焉鼎公俗姓謝  
氏敏慧之德發自齠齔剃落受具爰從弱年盡節師  
資苦心戒行操稟真懃言無矯妄寒松孤鶴可以喻  
其高潔矣自膺是選乃堅發弘願刻意增修或隨緣  
化誘積微成著或率勵徒弟盡力□□手足胼胝未  
嘗勗怠所受壇施除麤衣糲食之外一毫一粒悉歸  
營繕於是宏材名匠有求必至因高就下獨得形勢  
以心自相授偶運雕鐫斤斧之思焉數稔之內建立  
尊勝幢二所佛閣講堂齋堂僧房門屋窓二十三間

皆宏麗顯敞克壯前規喜近檀越歸心善誘依崇巖  
鑄衆像怒一百三所其餘院內石幢峭壁佛閣前後  
門屋巖口石橋規畫廣遠已在心匠將畢志願期於  
異日克就其功矣時也講堂初成巖秋景清修竹萬  
竿新池一泓星龕照灼月殿丹牖洞徹氛埃光映林  
壑語茲勢勝卽四時之物象可知矣大矣哉鼎公之  
瞻智宏規實法門之柱石苦海之舟航非心鏡同明  
情田廣闢誘人於善路拯物迷津詎能臻於此乎師  
以襟時因瞻禮目擊營建固求紀事難以庸淺爲辭  
是用直書盛績期不泯於貞石也咸通十二年八月

一日記金石苑

按題下有前州衙推將仕郎試左武衛兵曹參軍  
鄧下一行證以文中師以慘時因贍禮云云或當  
是姓鄧名慘也

口蒙

蒙官荆南觀察支使將仕郎試詹事府司直失姓

唐故宣義郎侍御史內供奉知鹽鐵嘉興監事

張府君墓誌銘并序

府君以乾符六年二月卅日終于常州義興縣之私  
第踰月其仲弟中權銜哀致書口口口以誌來請蒙

之與君寓居同邑頃在京師往來甚密蒙之季與君  
之季缺六交甚固以是得孰君之所行事書其善刊  
諸石則又安可辭耶君諱中立字口口其先范陽人  
晉司空華十五世孫高祖紹宗皇邵州武岡令贈宜  
春郡太守博學工書著蓬山事苑卅卷行於世蘇許  
公爲之製集序韋侍郎述撰神道碑宜春生盛王府  
司馬翰林集賢兩院侍書侍讀學士諱懷瓌有文學  
尤善隸草書與兄懷瓘同時著名學士生池州長史  
贈金州刺史諱涉嘗以文學登制策科金州生普州  
刺史諱爽進士及第登朝爲殿中侍御史口稱其口

享年不永竟不至高位當時惜之君卽普州第二子也幼失恃怙授兄長之訓初兄以口口調補霍山縣糺隨兄之任孜孜務學以至成人大中初再調授武進縣尉謂君曰曩以若等幼稚未克口生今旣長成可以蕝事吾恐墜先志爲平生羞遂以武進授君曰無以家事縈我我其行矣乃就詞科累戰皆北嗚呼天不福善旋抱陟岡之悲君撫視孤姪過於己子君之操尙出於先賢自武進歷處州麗水令婺州永康宰到永康不旬月旋丁內憂服闋予口口今祭酒常侍廉問陝郊素知其材奏爲郡糺值將受代事遂不

行君曰事之不行命也口口郊特達之恩官如何報乃裹糧策蹇專專致謝亦古人之心也旣至輦下親舊閒稍稍口口由是名姓頗達于上位今左丞韋公蟾卽君之親外丈人時爲中丞遂奏爲臺主簿甚爲美秩前輩名士多爲之然位卑任重尤不易處自憲長以降無不譚其盛美無何故口口口師王公疑總攬筦務奏爲嘉興監官意頗不樂辭不獲免遂授侍御史內供奉知缺四字年吏畏課溢咸謂得材及罷歸陽羨昔舊居植花木與親朋骨肉聚會貧缺五字之女嫁之男娶之雍睦怡愉無一日不得其所復慕黃老之

衡齋心焚脩頗得其字缺六無羨餘嗚呼真可謂賢達

之士矣方今盜賊未弭四方多事適當展材業振六缺

字知方聞薦於宰執欲委之重難忽暴疾不六七日

而終嗚呼其亦命耶享年五十有五娶汝南周氏楚

州盱眙主簿元諒之亞女有子三人長曰庭誨令娶

姑之女次曰裔圖字缺六性過禮克紹其家女三人長

適河東柳氏即前柳牧泰之第二子次許嫁宣字缺六

及笄季弟仁穎登進士第有時名從知廣南幕下仲

弟字缺十長安城南方屬道路艱虞未克歸祔遂卜用

其年四月十二日甲申字缺十任光鄉許墅村之南從

先大父之塋右禮也嗚呼缺銘曰

居官惠民居家睦親奉上禦缺陽羨之北荆溪之濱

下缺古刻叢鈔

徐口

失名唐末鎮海軍節度掌書記

吳越國故僧統慧因普光大師塔銘 并序

蓋聞道宏大覺教演三乘福濟羣生化周口界法口

口須彌之廣口河包巨海之波元微設喻於口口宗

旨口傳於心印紹隆大教代有口能口口歷劫增修

多生結習或托陰于軒裳鼎族或降生于帝子王孫

□□不二之門□入會三之理其來也隨機□現與  
 聖台符其往也傳化他方歸真□有□知□身□相  
 妙果菩提去住無常古今一體大師俗姓錢氏法號  
 令因即今天下都元帥吳越國王第十九子也宿根  
 淨業降慶王門□卞玉於庭中耀□珠于掌上稟訓  
 而□通六籍操心而暗達三明晨昏每□於缺六於  
 友愛爰□幼歲便斷葷辛及爾韶年遍□惠悟不觀  
 戲翫歛服綺紈□思□□之榮□□真如之理我王  
 方興正教大轉法輪遂捨□□得依釋氏□□而期  
 登妙覺修真而不□□城於是年始十三於梁乾化

三年四月十日申請住持安國羅漢寺以釋迦降聖  
 之日對佛披剃脫紫綬□章之缺四三□之衣雖云  
 學藝從師實乃天生智慧梁朝以我王匡守宗社康  
 濟生民日盛桓文勲高典冊能捨□門缺五大缺四  
 師於□□即□□在當令而定比□頌□□顯□□  
 特賜法號仍□命服自是密持秘藏靜住祇園不缺三  
 字喻青蓮之出水以缺六之無□當年於西都缺三  
 明大缺三梁朝恩命□法相大師加賜三十□□當  
 年封安國羅漢寺主詮題妙缺五常念妙法蓮花經  
 以為缺八神功缺十我王□巡錦里缺四時值中春

□□慶誕大師首登高座講讚蓮經缺六日景仰咸

稱於法缺十依貞明元年上元夜又於功臣堂講七

寶陀羅經教□□渺漫智理縱橫演說精微有缺三

機缺五安不唯英雄例缺五傾□□加以遍披內典

兼著文章所見一□□通□□五□俱下而又缺七

宏述作悉體於風騷詞藻皆精於雅麗□金□譽可

並芳猷刻燭成詩□□敏速二年我王□□上□廣

□僧□既啟號□□師主領加法戒都監選練大德

三年我王以釋迦真身寶塔□在□江特建蓮宮精

崇鴈塔聲以缺三爰增百寶之莊嚴缺四都城永與

軍民缺三茲勝事無出於□□兼授真身寶塔寺主

莫不愈精經論兼潔香光匡□教門紀綱法律悟道

而非求五缺三而益勵三堅梵□傾缺四仰六年加

授兩浙僧統龍德三年我王累功積德冠古超今大

國褒崇四方推戴祇膺簡冊肇啟王圖文武緇缺七

以大師演缺十改授吳越僧統賜號慧因普光大師

梵刹增輝僧徒□□必冀永為法主長作教宗孰缺五

字五□示相缺二十大□而廣增福力告靈祇而希

助陰陽湯藥醫治宣傳駱驛凡關禱祝靡所不聞缺三

字釋迦順□涅槃彌勒往往兜率乃知前佛後佛萬



論十□殊途同歸聖賢不易大師以寶大元年八月  
 十三日夜召□足□□付囑教門親述遺章缺五王  
 父尋命□□云吾常念法華經攝心不倦今欲集眾  
 諷誦益廣勝經纔唱真經端恭台掌□徹一卷乃命  
 鳴鐘令具奉間□以此夜三更便□圓寂缺四真身  
 寶塔寺享年二十有四君父號慟棠棣哀傷風悲而  
 佛日沉光煙慘而慈雲□色兩都僧道痛咽酸辛我  
 王唯□香花疊修勝善□資妙果益證□通仍命遷  
 院以其年十二月九日歸窆于塔缺三命□小師省

緣省善省□省勤省貞省□省□省超省□省希等  
 十人焚修住持大師幼離慈愛不戀榮華洞曉大乘  
 了傳佛性□□方而示□□萬念以缺四雙修□無  
 □□所以不久□世者缺三果成□人天缺三赴□  
 華演隆法教垂梵天之景福廕家國之延齡□□職  
 忝詞林叨塵翰苑□奉□□令撰塔銘惟知不可思  
 議叙述莫缺七乃為銘曰  
 □興法教六演真詮福利羣品三千大千缺七賢缺五  
 字生王寶河嶽靈氣珪璋令質願捨貴□重明佛日  
 博通典籍洞曉元微辭榮捨愛缺十衣大戒□明□

欽道德誦論明敏緇黃表則字缺四為民為國字缺五理  
教門缺八字缺十文缺五臨機字缺三人才口梵刹紀綱口門  
缺十三字缺三五缺二力所運口古超今轉化他方缺  
字十八建塔缺一字龍天擁衛垂廕口基千秋萬歲兩浙金石志

史口

闕名南唐時史虛白之子

鈞磯立談序

叟山東一無聞人也清泰年中隨先校書避地江表始營釣磯於江渚先校書意薄簪組心許泉石每乘

雙犢版轅車車後掛酒壺山童三五人例各總角負瓢并席具以自隨遇境物勝概則取酒徑醉或為歌詩自號釣磯閑客割江之後先校書不祿叟嗣守弊廬頗窺先志不復以進取為念會王師弔伐李氏挈宗以朝湖海表裏俱為王人大同之慶有識之所共感以為百生不可逢之盛際叟獨何者而私自怫鬱如有懷舊之思追惟江表自建國以來烈祖元宗其所以撫奄斯人蓋有不可忘者時移事往將就蕪沒叟身非朝行口不食祿固無預於史事顧耳目之所及非網罟之至議則波濤之窺語也隨意所商聊復

疏之於紙僅得百二十許條總而題之曰鈞磯立談  
使小子温成誦於口粗以存其梗概云吁文慙子山  
之麗與哀則有之才愧士衡之多辨亡亦幾矣鮑氏刊本  
案江南野史虛白有二子次舉進士長早喪孫温  
咸平中擢進士第陸游南唐書史虛白孫温天聖  
中獻虛白文集不言鈞磯立談愚謂立談當是虛  
白仲子所著虛白在南唐曾官校書郎故云先校  
書温爲虛白孫故曰使小子温成誦于口也虛白  
長子既早喪其爲仲子所著無疑惜其名不可攷  
耳

陳十八郎

失名南漢人

尊勝經石幢記

上乾和三年太歲乙巳三月八日丙寅缺陳十八郎

敬贖造加缺佛尊缺陀羅尼幢一座追薦幽途胡誤

物并乞自缺長於羅浮缺禪院供養設齋慶讚訖南

金石記

晉陵子

闕姓名大厯中人

雷氏琴銘

卓哉斯器樂惟至正音清韵古月澄風勁三餘神爽  
泛絕機靜雪夜敲冰霜天擊磬陰陽潛感否臧前鏡  
人其審之豈獨知政

灑水燕  
談錄

唐文拾遺卷之五十三

榮祿大夫三品頂戴前分巡廣東高廉道加四級臣陸心源輯

闕名一

春賦

春日遲遲采繫祁祁翫柔風兮韶景暎芳節兮嘉時  
勾芒兮太皞乘震兮執規道人道路以徇鐸太師奉  
職而陳詩候當振蟄時將覺龜或以命樂正而習舞  
或以勅獄吏而決辭爾其舉正於中履端於始瞻青  
旗之在御見斗杓之東指農祥晨正土膏脈起望三  
素之雲飲八風之水既布令於五時復傷心於千里



風以解凍魚方上冰戴勝降桑而翔集王睢鼓翼以  
嚶鳴若夫孔門浴沂之詠老氏登臺之樂知盛德之  
在木見平秩於東作雨潤榆莢雲飛白鶴旣薦鮪以  
乘舟亦先雷而奮鐸若乃珮蒼璧施土牛其祀戶其  
兵矛至若綵樹初頒含桃始薦舉此青旛戴之綵燕  
淳神水以釀酒用桃花而醕面亦復歌幽詩舞雲翹  
后妃之種稔初獻東宮之琴瑟方調亦云候屬青陽  
氣漸東陸食以蓬餌飲之漿粥進彼柔良去其桎梏  
復聞青鳥司啟元鳥司分萬物孚甲之際精華結紐  
之辰可以論爵賞之序可以留寬大之恩東郊方見

於朝日靈臺靡忘於書雲旣而日已載陽時惟獻歲  
必埋鬻而掩骼亦行慶而施惠祭馬祖而祀高禰薦  
鞠衣而修蠶器元日祈穀東郊迎氣女夷鼓土上人  
秉耒若乃三朝三元時惟正始進椒花以獻壽口白  
獸以言事設五木之湯列五辛之味戴憑重席而譚  
經江夏舉衣而告瑞畫鷄葦索以皆陳栢酒桃湯而  
具備放邯鄲之鳩獻彫胡之米或懸羊而磔雞或獻  
琮而執贄斯謂上日四時肇啟至其元日命社以祈  
農祥伊句龍之所主在水土而允臧漢祖口禴而事  
著陳平分肉而道光實以陰而主殺豈伐樹以斯亡

亦以封土達氣報本反始或爲羣姓而立或以百家  
共置爾其寒食之節禁火藏烟鬪雞蹋鞠佐以鞦韆  
原缺榆火將然古有司烜之禁俗有介推之言故周  
舉之書已布而魏武之令方傳又有暮春之首布和  
之辰臨流高會禊飲斯陳過平陽之第臨薄洛之津  
集彼張裴翫茲洧溱復有蕙肴輕泛犢車見尋周公  
之城洛邑秦昭之受水心或執蘭而容與或暴藥以  
沈吟天淵則壇名積石華林則隄號千金護花繞練  
以凝望流鶯滿枝而嚶音斯並著於時令故存之於  
翰林

大逆請改重法奏

貞觀二十一年刑部

准律謀反大逆父子皆坐死兄弟遞流此則輕而不

懲望請改重法

唐會要三十九

昭陵上食請依故事奏

永徽二年七月有司

謹按獻陵三年之後每朔望上食冬夏至伏臘清明  
社節等日亦准朔望上食來月之後改復平常昭陵  
所司上食請依獻陵故事

唐會要二十一

明堂制度奏

永徽三年六月二十八日有司

內樣堂基三重每基階各十二上基方九雉八角高  
一尺中基方三百尺高一筵下基方三百六十尺高

卷五十三  
三  
一丈二尺上基象黃琮爲八角四面安十二階請從  
內樣爲定基高下仍請准周制高九尺其方共作司  
約准二百四十八尺中基下基望並不用又內室各  
方三筵開四闔八窻室圓楣徑二百九十一尺按季  
秋大饗五帝各在一室商量不便請依兩漢季秋合  
饗總於太室若四時迎氣之祀則各於其方之室其  
安置九室之制增損明堂故事三三相重太室在中  
央方六丈其四隅之室謂之左右房各方二丈四尺  
當太室四面青陽明堂總章元堂等室各長六丈以  
應太室闊二丈四尺以應左右房室間並通巷各廣

一丈八尺其九室并巷在堂上總方一百四十四尺  
法坤之策屋圓楣楹檐或爲未允請據鄭元盧植等  
說以前梁爲楣其徑二百十六尺法乾之象圓楣之  
下所施圓柱旁出九宮四隅各七尺法天以七紀柱  
外餘基共作司約准面別各餘一丈一尺內室別四  
闔八窻檢與古合請依爲定其戶仍在外設而不開  
內外有柱三十六每柱十梁內有七間柱根以上至  
屋峻起計高八十一尺上圓下方飛檐應規請依內  
樣爲定其蓋屋形制仍望據考工記改爲四阿并依  
禮加重檐准太廟安鴟尾堂四向五色請施四垣及

四門辟雍案大戴禮及前代說辟雍多無水廣內徑之數蔡邕云水廣二十四丈四周於外三輔黃圖云水廣四周與蔡邕不異仍云水外周堤又張衡東京賦稱造舟爲梁禮記明堂位陰陽錄云水左旋以象天商量水廣二十四丈恐傷於闊今請減爲二十四步垣外量取周足仍依故事造舟爲梁其外周以圓堤并取陰陽水行左旋之制殿垣案三輔黃圖殿垣四周方在水內高不蔽日殿門去殿七十二步准今行事陳設猶恐窄小其方垣四門去堂步數請准太廟南門去廟基遠近爲制仍立四門八觀依太廟門

別各安三門施元闔四角造三重魏闕

唐會要十一

減馬料餉飢戶奏

開元二年  
宰臣等

陛下緣亢旱親降德音減膳撤樂朝野之人無任欣感然食粟之馬在廐猶多自今請馬料日減其半迴餉飢戶則人畜偕濟免供億之乏

册府

岳瀆祝版稱皇帝奏

開元九年六月五日太常

伏准唐禮祭五岳四瀆皆稱嗣天子祝版皆進署竊以祀典五岳視三公四瀆視諸侯則不合稱嗣天子及親署其祝文伏請稱皇帝謹遣某官某敬致祭于岳瀆之神

唐會要  
二十三



處分道僧奏

開元二十四年七月二十八日中書門下

臣等商量緣老子至流沙化胡成佛法本西方興教使同客禮割屬鴻臚自爾已久因循積久聖心以元元本系移就宗正誠如天旨非愚慮所及伏望過元日後承春令便宣其道僧等既緣改革亦望此時同處分

唐會要四十九

東封樂舞奏

開元二十九年六月

東封太山日所定雅樂其樂曰元和六變以降天神順和八變以降地祇皇帝行用太和之樂其封太山登歌奠玉幣用肅和之樂迎俎用雍和之樂酌福飲

福酒用福和之樂送文迎武用舒和之樂亞獻終獻用凱安之樂送神用夾鍾元和之樂禪社首送神用林鍾宮順和之樂享太廟迎神用永和之樂獻祖宣皇帝酌獻用光大之舞懿祖光皇帝酌獻用大明之舞太宗文武皇帝酌獻用崇德之舞高宗天皇大帝酌獻用鈞天之舞中宗孝和皇帝酌獻用太和之舞睿宗大聖真皇帝酌獻用景雲之舞徹俎用雍和之舞送神用黃鍾宮永和之樂臣以樂章殘缺積有歲時自有事東巡親謁九廟聖情慎禮精祈咸通皆祠前累月考定音律請編入史冊萬代施行

通典一百四十七

釐事二百日成考奏

天寶二年八月考功

准考課令考前釐事不滿二百日不合成考者釐事謂都論在任日至考時有二百日即成考請假停務並不合破日比來多不會令文以為不入曹局即不為釐事因此破考臣等參量但請俸祿即同釐事請假不滿百日停務不至解免事雪却上其考並不合破若有停務逾年不可更請祿料兼與成考

册府六百三十五

食封人兩京給付歿後元孫直下一房許在分

限奏

天寶六載三月六日戶部

諸道請食封人準長行旨三百戶以下戶部給符就州請受三百戶已上附庸使送兩京太府寺賜坊給付者今緣就州請受有損於人今三百戶以下尙許彼請公私之間未免侵擾望一切送至兩京就此給付即公私省便侵損無由又準戶部式節文諸食封人身歿已後所得封物隨其男數為分承嫡房一依上法分至元孫即不在分限其封總入承嫡房一依上法為分者若如此則元孫諸物比于嫡男計數之間多校數倍舉輕明重理實未通望請至元孫以下準元孫直下一房許依令式餘並請停唯享祭一分百世

不易自然爭競永息勲庸無替

唐會要九十

景皇帝陵臺加尊號奏

天寶十三載太常禮院

禮記追王太王王季上祀先公以天子之禮上文言追王王季下文言上祀先公足明追者全用天子之禮先公惟祀事得用故鄭元注言追王王季者以近起焉又言追王者改葬之矣葬且猶改則其餘可知伏以景皇帝並是追尊皆用天子之禮陵臺之號不合有殊

唐會要二十

詳議獄成奏

乾元元年十二月十四日刑部

准名例律法云獄成謂賊狀露驗及尚書省斷訖未

奏疏曰賊謂所犯之賊見獲本物狀謂殺人之類得狀為驗雖在州縣並為獄成若尚書省斷訖未奏即刑部覆訖未奏亦為獄成今法官商量若欵自承伏已經聞奏及有勅付法刑名更無可移者謂同獄成臣今與法官審加詳議將為穩便如天恩允許仍永為常式

唐會要二十九

決有兩種法開二門奏

乾元二年六月十四日刑部

謹按五刑笞杖徒流死是也今准勅除削絞死唯有四刑每定罪須降死刑不免還計斬絞勅律互用法理難明又應決重杖之人令式先無分析京城如是

蠹害決者多死外州見流嶺南決不至死決有兩種  
法開二門唐會要三十九

請復御正殿奏上元元年八月

陛下前以憊陽經時避居正殿凡在臣庶無任兢惶  
今至誠感通嘉雨霑洽兇渠授首同類革心臣等敢  
昧死請自今已後依常儀御正殿册府

州縣三考一替奏寶應元年十月吏部

准今年五月詔州縣官自今以後宜令三考一替者  
今數州申解疑三考後爲復待替到爲復便勒停請  
處分者今望令已校三考官待替到如替人不到請

校四考後停册府六百三十五

內外官授日計考奏閏月考功

內外員外官等除合在定數外准勅並任其所適既  
不入曹無憑檢考以來或有申者卽與見在同奏檢  
勘之時成破不一文案混雜條流未明臣等商量望  
請自今以後內外文武員外同正及試官除合在任  
外一切不在申校之限並聽從授日計考准中中例  
敘用册府六百三十五

立京外按察司奏寶應二年正月考功

請立京外按察司京察連御史臺分察使外察連諸

道觀察使各訪察官吏善惡其功過稍大事當奏者  
使司案成便奏每年九月三十日以前具狀報考功  
其功過雖小理堪懲勸者按成即報考功至校考日  
參事跡以為殿最唐會要八十一

釐革諸道料錢奏

大歷十二年五月中書門下

得蘇州刺史兼御史大夫知臺事李涵東都河南江  
淮山南等道轉運使吏部尚書兼御史大夫劉晏戶  
部侍郎專判度支韓滉等狀釐革諸道觀察使團練  
使及判官料錢觀察使令兼使不在加給限每月除刺史正俸  
料外每使每月請給一百貫文雜給准時價不得過

五十貫文都團練副使每月料錢八十貫文雜給准  
時價不得過三十貫文觀察判官與都團練判官同每月料  
錢五十貫文支使每月料錢四十貫文推官每月料  
錢三十貫文巡官准觀察推官例已上每員每月雜  
給准時估不得過二十貫文如州縣見任官充者月  
料雜給減半刺史知軍事每人除正俸外請給七十  
貫文如帶別使不在加限雜給准時估不得過三十  
貫州縣給料其大都督府長史准七府尹例左刺史  
八十貫文別駕五十五貫文長史司馬各五十貫錄  
事參軍四十貫判司三十貫參軍博士各一十五貫

錄事市令等各一十三貫縣令四十貫丞三十貫簿尉各二十貫右謹具條件如前其舊准令月俸雜料紙筆執衣白直但納資課等色并在此數內其七府准四月二十八日勅文不該者並請依京兆府例處分其中州中縣已下三分減一分其額內釐務比正官減半其州縣官除差充推官巡官及司馬掌軍事外如更別帶職亦不在加給限

唐會要九十一

停諸州團練守促使奏

大曆十二年五月十日中書門下

諸州團練守捉使請一切並停其刺史自有持節諸軍旅司馬即同副使之任其判司既帶參軍事望令

司兵判兵馬案司倉判軍糧案司事判甲仗案其兵士量險隘召募謂之健兒給春冬衣并家口糧當土百姓名曰團練春秋歸冬夏追集日給一身糧及醬菜諸道先置上都邸務名留後使宜令並改為上都進奏院官諸道觀察都團練使判官各置一人支使一人推官一人餘並停

唐會要七十八

武德以來功臣約為三等奏

建中元年九月五日史館

武德已來實封陪葬配饗功臣名跡崇高者十一人第一等司空魏國公裴寂納言魯國公劉文靜太尉趙國公長孫无忌尚書左僕射衛國公李靖司空英

國公李勣中書令漢陽王張柬之中書令博陵王崔  
元暉侍中平陽王敬暉侍中扶陽王桓彥範中書令  
南陽王袁恕己尚書左僕射徐國公劉幽求二十四  
人第二等司空河間王孝恭開府儀同三司鄂國公  
尉遲敬德特進莒國公唐儉輔國大將軍夔國公劉  
宏基左驍衛大將軍薛國公長孫順德行臺尚書左  
僕射蔣國公屈突通行臺尚書右僕射鄖國公殷閱  
山戶部尚書渝國公劉政會工部尚書應國公武士  
護荊州都督譙國公柴紹揚州都督襄國公段志元  
右驍騎大將軍郟國公張公謹右領軍大將軍盧國

公程知節徐州都督胡國公秦叔寶禮部尚書永興  
縣公虞世南工部尚書武陽縣公李大亮散騎常侍  
豐城縣男姚思廉左武侯大將軍邢國公蘇定方夏  
官尚書耿國公王孝傑右武衛大將軍韓國公張仁  
愿光祿卿琅邪郡公王同皎兵部尚書代國公郭元  
振尚書左丞相燕國公張說兵部尚書中山郡公王  
峻等三十四人第三等司空淮安王神通特進江夏  
王道宗中書令郢國公宇文士及行臺左僕射鄴國  
公竇軌大府卿葛國公劉義節左屯衛大將軍襄武  
郡公劉師立右驍衛大將軍梁國公安興貴右武衛

大將軍申國公安修仁左衛大將軍譙國公竇琮夔  
州都督息國公張長遼黔州都督夷國公李季和右  
光祿大夫羅國公張平高左監門大將軍榮國公樊  
興左武侯大將軍郇國公錢九隴右武侯大將軍沔  
陽郡公公孫武達左武衛大將軍懷寧縣公杜君綽  
右驍衛將軍安化縣公龐卿憚涼州都督廣德郡公  
李安遠涼州都督同安郡公鄭仁泰刑部尚書吳興  
郡公沈叔安右領軍虢國公張士貴左驍衛大將軍  
畢國公阿史那杜爾右武衛大將軍琅琊郡公牛進  
達輔國大將軍嘉州郡公周護仁右武侯大將軍天

水郡公邱行恭尚書左僕射冀國公裴冕吏部尚書  
清河郡公房琯門下侍郎衛國公杜鴻漸開府儀同  
三司武威郡王李嗣業衛尉卿顏杲卿常山郡太守  
袁履謙御史中丞張巡將軍南霽雲八人第二等大  
尉臨淮王李光弼兵部尚書涼國公李抱玉司空霍  
國公王思禮御史大夫劉正臣范陽長史賈循尚書  
右僕射信都郡王田神功左羽林大將軍薛景偃睢  
陽太守許遠七人第三等太子太師幽國公韋見素  
侍中韓國公苗晉卿尚書左僕射趙國公崔圓尚書  
右僕射辛雲京尚書右僕射扶風郡王馬璘右散騎



常侍太原尹鄧景山按史傳考詳事實約為三等具  
列如前唐會要 按即行恭以  
四十七 下當有脫文

甲庫採擇一人專押奏建中二年十月  
十一 中書門下

中書門下及吏部制勅甲庫等准式中書舍人給事

中吏部員外郎並合專判緣官望清高兼外有職事

不得躬親所以比來文歷多有罪過今請每庫採擇

一公清勤幹專押甲庫冀事得精其知經四周年無

負犯仍望依資與改官唐會要  
八十二

量復具員改轉舊制奏建中三年閏正月  
十八日 中書門下

准貞觀故事京常參官及外官五品已上每有除拜

中書門下皆立簿書謂之具員取其年課以為遷授

此國之大經也自艱難已來此法遂廢垂將三十載

伏望自大歷十四年已來量署具員據前資見任員

量與改轉從今已後刺史四考郎中起居侍御史各

兩考餘官各三考與轉其升進黜退並准故事處分

仍下天下州縣審勘責前資見任其鄉貫歷任官諱

同一狀牒中書門下唐會要  
五十四

諸司文狀依限錄奏建中四年六月  
中書門下

應送諸司文狀檢勘節限中考文狀等並是每年長

行之事尚書省各依限錄奏舊例經一宿即出如經

三日不出請本司更修單狀重奏又三日不出即請本司長官面奏取進止其內狀到各令本司兩日內具省案及宣黃送到中書依前件所定限勘會宣下即事免稽滯又准開元十九年四月勅應加階并授及勲封甲并諸色闕等進畫出至門下省重加詳覆駁止者宜便注簿落下以墨塗訖仍於甲上具注事由牒中書省同上

請二王入朝事畢還藩奏

建中二年有司上言

按漢儀注朝賀正月常一王四侯十餘載一至又按史記諸侯王朝凡四見留長安不過二十日今諸王

入朝者甚多非為示之簡要宏之禮節既乖古制有

虧前典臣請每歲二王入朝禮畢還藩敢以義請唐會要

要二

公主出降乘金根車奏

貞元二年二月太常

長林公主出降準開元禮合乘厭翟車去年嘉誠公主出降得駕部牒造來多年不堪乘駕又得內侍省報舊例相沿乘金根車其時便已行用今緣禮會日逼創造必不及請準嘉誠公主例乘金根車唐會要卷六

吏曹條例奏

貞元二年五月吏部

伏准貞元元年七月二十五日勅諸州府及京五品

已上官停使下郎官御史等宜付所司作條件聞奏者緣諸色功優非時授官闕員稍多請作節限許集上州刺史兩府少尹四赤令停替後請許一月內于都省陳牒納文狀畢檢勘同具申歷每至月終送名中書門下仍請不試太原河中鳳翔江陵成都興元府少尹赤令及京兆畿赤令中下州刺史諸使下停減郎官御史等停官當年并聽集六品以下常參官以理去任者當年聽集具員官京兆府先申中書門下省檢勘未成失文歷者其中先東西在遠不及選集並請依後件合集人限所在陳牒隨例赴集選人

有明經進士道舉明法出身無出身人有經制舉宏詞拔萃及第判入等清白狀并有上下考校奏成及孝義名聞制及勅褒獎者或曾任郎官御史起居補闕拾遺太常博士兩府判司兩府畿赤官使下郎官觀察使節府都團練都防禦度支水陸運鹽鐵使留守判官支使推官書記等制勅分明貞元元年十二月已前離任者一切聽集并六府少尹鵬赤令並不在試例應未及一考已下被替丁憂服滿廢省患解侍親并隔絕不上州府縣升降等官並聽當集緣未得資望准六品已下選人例所試狀縱入下等望臨

時據人材定留放其違程不上人經免殿者聽集仍却還本道本色官應准格未合集人其中有文詞宏瞻學術精通灼然爲人所知亦任於所在府州陳狀本州長官精加選擇堪獎拔者具解申送依例赴集至省審加考覈有才實相副別狀送名如有踰濫其本州署申解牒本判官量事科罰四品官中有衰疾情願任致仕官者但是正員官不限考數任於所在州府陳牒依合集人狀樣通由厯准前送本道觀察使上省不用身到禮部附學官先及第人薦關吏部者並聽集准例試狀定留放應集合試官並望准舊

例狀一道仍准建中二年格例及大曆十一年六月勅請條委左右僕射兵部尙書侍郎同考試其狀考入上等具名所試狀依限送中書門下其考入下等者任還

唐會要七十四

階高官卑准格處分奏

貞元六年六月吏部

准格內外官承泛階應入五品者制出日須經一十六考見任六品官本階加正六品上應入三品者制出日經三十考見任四品官本階加正四品上自建中元年六月初有特勅諸道將士准制加泛階爵勳等特許不檢勘注擬其正員官不在此限自後有司

因循以例破格應試官敘階並不限官品其中或官是九品階稱朝議郎或官是六品階稱正議大夫加一泛階並入三品五品伏以元勅制令不檢勘無不限官階之文若以例判成即階違格令請別立條限漸歸舊章應將士兼試官敘泛階奏勅已到令入三品者矜其勞効須有優獎其官階相當並請不限考數檢當任一銜有實許與結敘其階高官卑者請准格處分

唐會要八十一

考課諸司比類格文定升降奏貞元七年八月考功

准考課令諸司官皆據每年功過行能定其考第又

准開元天寶以前勅朝官每司有中上考亦有中中考自三十年來諸司並一例中上考且課績之義不合雷同事久因循恐廢朝典自今以後諸司朝官皆須據每年功過行能仍比類格文定其升降以書考第不得一例申中上考應諸司長官書考不當二品已上具銜牒上中書門下四品已下依格令各准所失輕重降考唐會要八十一

觀察刺史等官考績奏裁奏貞元七年十二月校外官考使

准考課令三品以上官及同中書門下平章事考並奏取裁注云親王及大都督亦同伏詳此文則職位

崇重考績褒貶不在有司皆合上奏今緣諸州觀察  
刺史大都督府長史及上中下都督都護等有帶節  
度使者方鎮既崇名禮當異每歲考績亦請奏裁其  
非節度觀察等州府長官有帶臺省官者請不在此  
限唐會要  
八十一

請停東都禮生奏貞元八年四月太常寺

本置禮生是資贊相東都既無祠祭不合虛備闕員  
且無功勞妄計考課年滿之日一例授官比來因循  
實長徽幸其東都太廟及郊社齋郎先並准勅停訖  
惟禮生尚在伏請下吏部自今以後不得更有注擬

其先補者並請追赴上都已滿者伏望量留四年未  
滿者請折聽或入考如有情涉規避委託事由兩月  
內不赴西都即請牒吏部注甲解退收實本色冀循  
事實永絕姦源唐會要  
六十五

貢舉人謁先師請別擇日奏貞元九年九月太常

以十一月貢舉人謁先師今與親享太廟日同准六  
典上丁釋奠若與大祀同日即用中丁謁先師請別  
擇日唐會要  
三十五

搥鼓進狀却付本司奏貞元九年御史臺

今後府縣諸司公事有推問未畢輒搥鼓進狀者請

却付本司推問斷訖猶稱抑屈便任詣臺司按覆若實抑屈所由官錄奏推典量罪決責如告事人所訴不實亦準法處分

唐會要六十

內供奉御史班位奏

貞元十二年十月御史臺

伏准貞元二年班序敕諸使下三院御史有本官是常參官兼者即入本官班如內供奉裏行即入御史班緣使下御史稍多近例並不在內供奉班內臣等參詳伏請自今已後請使下御史內供奉者入門日並依宣政殿前班位次員外郎之後在正臺監察御史之上便為常式庶叶通規

唐會要六十二

旱損借貸奏

貞元十三年三月

諸道州府各遭旱損其諸州府有貞元八年已前見貯米麥斛斗三百八十萬石請各委州府借貸今秋成熟後依本數却納

冊府五百十一

女子李妙法廬墓奏

貞元十三年深州奏

博野縣女子姓李氏號妙法年六十六廬墓經三十七年初李少年遇安祿山逆亂被虜劫他鄉聞父亡欲奔喪又以有一子不忍分離遂割一乳留別孩子而奔喪既而號慟擗踊遂燒一指以啟告先靈又以不見靈柩志欲廬墓兄弟不許遂以刀刺心見其志

竟開埏道見棺櫬塵土以舌舐之又以髮拭棺上塵埃自是廬舍墓側往往有異鳥翔集其墳上先無樹木李氏手自栽植雜樹一千根並高數尺初廬墓數年又遇母疾漸至危殛李氏每見母飲即飲母食或嘔涎唾並皆嘗之無幾亡李氏自刺血母臂上以為記其至性如此南部新書

改公主册禮奏

貞元十五年七月三日有司

册公主儀注伏準開元之儀侍中合宣制今儀注誤以中書令宣制則其日侍中書令合受册又合以册授與册使中闕行事之儀今儀注誤以中書侍郎授册使則其日闕中書令授册之儀內册案自東上閣出

詣橫街北合宣付中書門下其侍中中書令其日并

行事

今儀注誤獨宣付中書令則侍中無憑宣付

今欲改唐會要卷六

病死羊犢送還太僕奏

貞元十八年五月太僕

每年四季送太常入滌羊犢送後或稱暴死准式埋

訖真偽難明伏以毛色羊犢甚難擇採如有病死者

望還太僕卿准數送替庶易辯明永為常式

唐會要二十三

三品官假滿日正衙參見奏

貞元二十一年五月御史臺

伏准承前舊例諸司三品以上長官請假滿日正衙參見其餘品秩卑自有本司官長不曾于正衙參假去年六月侍御史竇羣奏令尚書省四品中書門下



御史臺五品同三品例正衙參假訖既失舊章又煩聖聽今請准例三品以上假滿日正衙見如有違越請准乾元元年三月勅每犯奪一月俸唐會要八十二

升祔禮訖公私聲樂復常奏永貞元年十月太常

內外公私聲樂祭祠等漢魏已來既葬祔廟之後皆復其常本朝行之以為故事今德宗皇帝十一月四

日行升祔之禮訖事請皆如舊唐會要三十四

改正昭成竇后忌日行香奏永貞元年十二月中書門下

昭成皇后竇氏按國史長壽二年正月二日崩其時緣則天臨御用十一月建子為歲首至中宗復舊用

夏正即正月行香廢務日須改正以十一月二日為

忌唐會要二十三

曾太皇太后沈氏服制奏永貞九年九月禮儀使

孫為祖母合服齊衰五月漢魏以來時君皆行易月之制皇帝為曾太皇太后沈氏合五日而除內外百寮並令從服以五日為制其在興慶宮嘗侍奉太上

皇者十三日而除唐會要三十八

廢文敬恭懿太子廟奏元和元年太常寺

七太子廟文敬恭懿太子兩京皆是旁親伏詳禮經無文享祀官員所設深恐非宜其兩京官吏並請勒

停其屋宇請令宗正寺勾當者

唐會要十九

順宗配享昊天上帝奏

元和元年八月太常禮院

季秋大享明堂祀昊天上帝謹按孝經云宗祀文王於明堂以配上帝今太廟附享禮畢大享之日准禮合奉皇考順宗至德大聖大安孝皇帝配神作

主唐會要十二

唐文拾遺卷之五十四

榮祿大夫三品頂戴前分巡廣東高廉道加四級臣陸心源輯

闕名二

致仕官身故非三品以上不輟朝奏

元和元年九月中書

門下

近奏定合輟朝官品勅已尋行其致仕官多是優禮合同貞觀勅例未該須有處分自今以後其致仕官如非曾任三品以上正官及歷四品清望並不在此例

唐會要二十五

請置具員簿奏

元和二年正月月中書門下



正月敕文令於中書置具員簿以序內外庶官爰自  
近年因循遂廢清源正本莫急於斯令京常參官及  
外官五品已上前資見任起元和二年量定考數置  
具員簿應諸州刺史次赤府少尹次赤令諸陵令五  
府司馬及上州已上上佐東宮官除左右庶子王府  
官四考已上並請五考其臺官先定月數今請侍御  
史滿十三月殿中侍御史滿十八月監察御史依前  
二十五月與轉三省官並三考餘官並四考外其文  
武官四品已上並五考商量與改尚書省四品已上  
文武官三品已上緣品秩已崇不可限以此例須有

追改並臨時奏聽進止其權知官後至兩考然與正  
授不得用權知官資改轉其內外諸色官中緣官闕  
要人及緣事須有改移者卽不在常格敘遷之限諸  
道及諸使副使行軍司馬判官參議掌書記支使推  
官巡官等有勅充職掌舉檢校五品已上官及臺省  
官三考與改轉官四考與改如未經考者並諸授同  
類官經兩考者依資與轉如前御史是使下官未經  
考者請以本官改轉經三考依資轉與仍許通前任  
計爲考數其軍州戎鎮別立功効事跡彰著爲衆所  
知者須別甄錄卽具上事跡奏聽進止其罷使郎官

御史任依舊冬薦其諸道應須薦送人等自今已後諸郎官御史者便及時限同為冬薦所同准例檢勘申送中書門下六品已上非郎官御史者狀到後望付吏部准貞元元年二月七日勅處分册府六百三十一

請停諸陵遣使奏

元和二年九月  
月中書門下

先王制禮皆有著定之文後聖沿情或徇一時之敬過猶不及遂至于煩詢于有司參酌禮意若無釐革稍贖舊章其太廟諸陵薦新諸陵節日遣使臣等商量請每除太廟時饗及朔望上食諸陵朔望奠親陵朝晡奠外餘享祀及忌日告陵等並停其果實甘橘

蒲桃菱梨遠方所進並請遣使於諸陵薦獻果實之中甘瓜時異亦請至時上薦其餘瓜果四時新物並委陵令與縣司計會及時薦獻其專使亦停唐會要十八

依舊置校理官奏

元和二年七月  
集賢院

伏准六典集賢院置學士及校理修撰官累聖崇儒不失此制至貞元八年判院事官陳京始奏停校理分校書郎四員正字兩員為集賢院校理正字今諸校書郎正字並却歸秘書省當司請依舊置校理官庶循名實且復開元故事又直官請減五人寫御書請減十人唐會要六十四

中瑞下瑞申報有司奏元和二年八月

諸道草木祥瑞及珍禽異獸等准永貞元年八月勅

自今以後宜並停進者伏以貢獻祥瑞皆緣臘饗告

廟及元會奏聞若例停奏進即恐闕于盛禮准儀制

令其大瑞即隨表奏聞中瑞下瑞申報有司元日聞

奏自今以後望准令式唐會要二十九

兩京監生每館定額奏元和二年十一月

兩京諸館學生總六百五十員請每館定額如後附

監學生總五百五十員國子館八十員太學館七十

員四門館三百員廣文館六十員律館二十員書館

十員算館十員伏見天寶以前各館學生其數至多

並有員額至永泰後西監置五百五十員東監近置

一百員未定每館員額今謹具定額如後伏請下禮

部准額補置唐會要六十六

非時選集註擬奏元和三年正月吏部

准去年六月勅元和元年下文狀人但有續闕即便

註擬元和二年下文狀人均待有兩季下續闕至冬

未合收用者注擬伏以非時選集見在無多待闕多

年艱辛轉甚其元年二月十三日已前下文狀應未

得官人並請依當年平選留人例一時註擬其十月

以後及今年下文狀人如元勅卽與處分亦請准前  
註擬其餘並請待註平選人畢有關相當便註擬如  
無闕相當卽請許待續闕

唐會要  
七十五

三千里外縣限十二月赴上奏

元和三年  
三月吏部

應授三千里外縣替年終缺人等准元和二年五月  
十九日敕量抽三千里外縣令至元和三年終計日  
成四考闕其新授三千里外縣令等合用待舊人成  
四考後至十二月二十五日赴請准元和三年三月  
二十四日敕其新授三千里外官人請從甲下後不  
計程限但至十二月內赴上如出十二月內卽違程

例處如授替人續有故事便請放授官人上上不必  
待至十二月仍請自今已後每年若有替年終缺人

亦請准此

唐會要  
六十九

舉行鄉貢舉人奏

元和三年  
五月兵部

伏准貞元十四年九月勅鄉貢舉人權停者伏以取  
士之方文武並用舉選之制國朝舊章參調者旣積  
資勞入仕者必先貢舉自經停廢今已十年別趨倖  
門漸絕根本典彝具在可舉而行其鄉貢舉恐須准  
式却置

唐會要  
五十九

薦舉縣令分入三銓註擬奏

元和四年正  
月中書門下

伏准元和二年制書舉薦縣令等前後勅文非一有司難於遵守今請中外所舉縣令並隨表狀十月三十日到省省司精加磨勘依平選人例分入三銓註擬平選人中有資序事跡人才與前舉縣令相類即先注擬時集望停唐會要六十九

知郵驛官書考奏元和五年正月考功

諸道節度使觀察等使各選清強判官一人專知郵驛如一周年無違犯與上考如有違越書下考者伏以遵守條章纔為奉職便與殊考恐涉太優今請不違勅文者書中上考其違越者依前書下考仍請永

為常式

唐會要六十一

請諡行狀須佐史撰錄奏元和五年二月考功

當司三品以上准格合請諡官準貞元七年格文奉寶應二年正月十八日勅節文佐史錄行狀陳請考功詳覆訖下太常定諡者近日以來撰錄行狀多非佐史既乖事實又違格文伏請從今後請諡行狀準勅文須是佐史唐會要八十

減省官員請存舊例奏元和六年八月

得兵部侍郎許孟容等狀當司准六月二日減省官員及釐革三衛等應管京官及外官共三千三百二

十九員京官七百六員武官員數不多俸錢比文官較少又在中書門下兩省御史臺左右神策及諸軍諸使依敕驅使員闕至少難議停省並請仍舊外官二十六萬二十三員所管諸府自折衝以下總無料錢例多闕乏空有府額其鎮戍官等或有任者不過數員縱使停減並無損益伏請存舊例六番三衛都四千九百六十三人縱使分番當上配役處多移牒勘會須得詳請續商量聞奏

唐會要五十九

縣令犯贓殿罰舉薦官奏

元和六年十月

准建中元年敕每年授官人令舉自代狀者又臣聞

周之羣寮委於冢宰漢之多士辟於有司故凡稱大僚皆得盡善陛下念黎元之困設令長之科羣僚舉知天下蒙福薦賢相繼敦勸大行苟或容私則利害攸伏伏請所舉縣令到任刑罰寬濫及有贓犯者其舉薦官削階及停見任書下考並准元和三年敕處分委御史臺諸道觀察使嚴加察訪不得容貸其諸道所舉官屬及有狀論薦人如有贓犯過惡亦請具名聞奏量加殿罰所冀人知戒懼不敢妄行為官擇人得賢報國

唐會要六十九

孫用祖蔭准例收補奏

元和六年十一月禮部



准今年九月吏部所奏勅應補太廟齋郎用蔭官並五品已上子六品常參官子補者今詳節文所用五品六品蔭者唯許子並不該孫又節文其應補太廟齋郎郊社齋郎孫用祖蔭子用父蔭卽孫之與子並許收補恐前後文字有所差錯今格限已及須守勅文其孫用祖五品已上蔭者恐須准舊例收補

唐會要五十九

顏頽奔喪奏

元和六年閏十二月廬州

量移官司戶參軍員外置同正員顏頽母在揚州十二月二十七日身亡今請奔喪者准貞元十八年五

月十九日勅自今已後流人左降官稱遭憂奔喪者

宜令所司先奏聽進止

唐會要四十一

請定官俸規制奏

元和七年中書門下

國家舊章依品制俸官一品月俸三十千其餘職田祿米大約不過千石自一品以下多少可知艱難以來網禁漸弛於是增置使額厚請俸錢故大厯中權臣月俸有至九千貫者列郡刺史無大小給皆千貫常袞爲相始立限約至李泌又量其閑劇隨事增加時謂通濟理難減削然有名存職廢額去俸存閑劇之間厚薄頓異將爲定式須立常規

唐會要九十一

登科人據等第高下注官奏

元和八年四月吏部

應開元禮及學究一經登科人等舊例據等第高下量人才授官近日緣校書正字等名望稍優但需科第皆求注擬堅待員闕或至踰年若無科條恐長僥倖起今已後等第稍高文學兼優者伏請量注校正其餘署開元禮人太常寺官有闕相當注通經人國子監官闕相當者並請先授以備講討如不情願即通注他官庶名實有恪紀律可守其今年以前待闕人亦請依此條限使為常制

唐會要七十六

勤會諸司食利錢奏

元和九年十一月戶部

準八月十五日勅諸司食利本錢出放已久散失頗多各委本司勘會其合徵錢數便充食錢若數少不充以除陌五文錢量其所欠添本出放者令准勅各牒諸司勘會得報據秘書省等三十二司牒應管食利本錢物五萬三千九百五十二貫九百五十五文各隨司破逃亡散失見在徵數額與秘書省三千三百元置不同今但據元置數額而已

四貫五	太常寺	六千七百二十	光祿寺	一千二百九
四文	宗正寺	一百七十七貫	衛尉寺	一千二百五
一文	大理寺	五千九百二十四	鴻臚寺	二千六百
貫	農寺	二千七百三十五	太府寺	一千五百八
文	農寺	七百七十文	太府寺	九百文

中省九百九十貫  
 詹事府一千一百九十七文  
 國子監二千六百五十四文  
 少府監一千三百三十四文  
 將作監一千六百五十四文  
 左春坊一千三百三十四文  
 右春坊一千三百三十四文  
 司天臺三百八十七貫  
 家令司一千八百七十八文  
 太僕寺六百三十四貫  
 總監二千六百七十四文  
 左藏庫六百二十二貫  
 尚食局八百三十四貫  
 尚舍局三百七十四貫  
 尚輦局一百二十二貫  
 太倉二千四百八十八文  
 內中局六百三十六貫  
 萬年縣三千四百八十八文  
 長安縣二千七百四十五文  
 左衛五百四十四貫  
 左司禦帥府二百一十貫  
 右司禦帥府一百九十三貫

謁先師常參官觀禮奏  
元和九年十一月禮部貢院

貢舉人見訖謁先師准格學官為開講質定疑義常

參及致仕官觀禮舊例至時舉奏  
唐會要三十五

左降官考滿量移奏  
元和十二年九月刑部

准今年七月二十一日勅諸道左降官等經五考滿日許量移者其貶降日授正員官或無責辭亦是責授並請至五考滿然後本任處申關并餘左降官緣任處州府多是遐遠至考滿日其有申牒稽遲致留滯者其刺史本判官錄事參軍等請與下考如考滿後雖已申牒未經量移間其祿料並准天寶貞元兩度勅文依舊支給其本犯十惡等罪已有正名仍請

依舊

唐會要四十一

御史職事行立以勅文為先後奏元和十三年御史臺請應除御史職事但據上日為先後未上日不得計月數者准其年九月七日勅不逾一箇月不在此限行立班次即宜以勅內先後為定臣伏以御史除官之時據來處各有遠近若據一月便為懲創恐乖舊制殊未合宜伏緣臺司職事各有定分先後次第不可逾越若行立班次既依勅令公事先後須繫到日則院長本職翻然在下制置錯亂無所遵承行之累年轉見其弊伏請自今以後三院御史職事行立一

切依勅文先後為定除拜上日便為月數須觀積効豈繫旬時如有除官以後赴職稽慢量道路遠近則臺司別具名聞奏須議懲責豈止顛倒職事而已唐會要六

敘錄將士准勅處分奏

元和十三年六月中書省

應敘錄將士兼試官加泛階入三品五品伏准貞元六年六月二十七日吏部所奏具有科條近日因循多不遵守遂名器具濫昇進無章須重申明冀絕僥倖自今已後應敘錄入五品三品階者並請准前勅處分其正三品以上階准格式須有特恩不在用考

累敘之限

唐會要八十一

大儼儀服奏

元和十三年十二月左右金吾引駕仗

以舊例驅儼振子等金吾將軍以下並具襴笏引入  
閤門謹案大儼者所以驅除羣厲合資威武其光儀  
襴笏之制常參朝服舊制未稱今後請各衣錦繡具  
巾袂帶儀刀部引出入則與事合宜

唐會要七十一

請諡立限奏

元和十四年都省

請諡家子弟及門生故吏請立限未葬以前陳狀其  
家在遐遠及別有事故者任至一年內陳狀到考功  
一月內檢勘下太常禮院受牒後一月內定牒報考

功毓德邱園節行特異無官及位卑者任所在長吏  
奏請仍許不拘年限未立節限以前合請諡未請者  
家在城者任六箇月內於所司申請家在外者亦許  
至一年內申請立節限後如過限久全不請諡其中  
有善惡尤著可存勸誡請委考功訪察行實便請牒  
下太常禮院定諡庶使善必見稱惡無幸免伏准太  
常博士李虞仲奏凡官秩合得請諡者必先葬期請  
於考功牒送太常寺禮院然後一月內定諡者伏奉  
三月二十五日勅宜令尙書都省與考功及太常禮  
院更審條流明立節限聞奏者今與考功郎中蕭祐

太常博士李虞仲等商議具條流節限如前唐會要八十八

責授官任自參選奏元和十四年十一月吏部

今請應責授官前制已改轉者各勒依今任考數停

替日便放東西合選時任自參選不要反更有檢轄庶使人無凝滯事有指歸唐會要四十一

考狀不得有虛美閒言奏元和十四年十二月考功

自今以後應注考狀但直言某色行能某色異政某色樹置某色勞効推斷某色獄糾舉某色事便書善惡不得更有虛美閒言其中與下考亦各言事狀然與注考並不得失於褒貶如違據所失輕重准令降

書考官考唐會要八十一

奏報官吏善惡奏同上

據寶應二年勅御史臺分察使及諸道觀察使訪察官吏善惡功過稍大事當奏聞者每年九月三十日具狀報考功至校日參驗事跡以為殿最伏以近日功過都不見牒報今後諸司不申報者州府本判官便與下考在京諸司道節級糾處本判官敕課日量事大小黜陟唐會要八十一

諸道正員官依資改轉奏元和十五年二月書門下

見任正員官充職掌等比限兩考及授官經二周年

以上方許奏請然與依資改轉有才在下位者不免  
留滯請自今已後諸道使應奏請正員官充職掌經  
一年者即依資與改轉如未周者即量與同類試官  
如此處分庶將得中册府六百三十一

豐陵合停日祭奏

元和十五年四月禮儀使

按禮文令式皇祖以上至太祖陵寢朔望上食其元  
日寒食冬至臘社日各設一祭皇考陵朔望及節祭  
外每日進食今豐陵合停日祭景陵日祭如式唐會要二十一

饗景陵以香藥代魚肉奏

元和十五年五月殿中省

尚食局供景陵干味食數內魚肉委食味皆肥鮮掩  
埋之後薰蒸頗極今請移魚肉食於下宮以時進饗  
仍令尚藥局據數以香藥代之唐會要二十一

憲宗配享昊天奏

元和十五年五月太常禮院

季秋大享明堂祀昊天上帝謹按禮文皇考配神作  
主今年季秋准禮合奉憲宗聖文章武皇帝配神作  
主唐會要十二

州郡收銅鑄錢奏

元和十五年八月月中書門下

伏準羣官所議鑄錢或請收市民間銅物令州郡鑄  
錢當元和以前鹽鐵使未置亦令州郡勾當鑄造今

若兩稅納正段或慮兼要通用見錢欲令諸道公私銅器各納所在節度團練防禦經略使便據元勅給與價直並折兩稅仍令本處軍民鎔鑄其鑄本請以留州留使年支未用物充所鑄錢便充軍府州縣公用當處軍人自有糧賜亦校省本所資衆力並收衆銅天下併功速濟時用待一年後鑄器物盡則停其州府有出銅鉛可以開爐鑄處具申有司便令同諸監冶例每年與本充鑄其收市銅器期限並禁鑄造買賣銅物等待議定便令有司條流聞奏其上都鑄錢及收銅器請各處分將欲施行尙資周慮請令中

書門下兩省尙書省御史臺並諸司長官商量重議

聞奏

唐會要八十九

祧遷睿宗神主奏

元和十五年禮部

准貞觀故事遷廟之主藏于夾室西壁今夾壁南北三間第一間世祖室第二間高祖室第三間太宗室伏以山陵日近睿宗皇帝祧遷有期夾室西壁二室外無置室處准江都集禮古者遷廟之主藏于太室北壁之中今請于夾室北壁以西爲上置睿宗皇帝神主石室

唐會要十五

公卿拜陵取清望官充奏

長慶元年六月吏部



公卿拜陵通取尙書省及四品以上清望官中書省及諸司五品以上清望官及京兆少尹充

唐會要二十

奏彈違例常參官奏

長慶二年七月御史臺

文武常參官閣內奏事近年無例昨者威衛將軍高扶援引德音迴出班位緣非彈奏本條未敢舉勘起今以後其文武常參官應有諫論合守進狀常例有違卽請奏彈

唐會要二十五

拜陵稱疾罰俸奏

長慶二年御史臺

應差定拜陵公卿伏請除准式假外如吏部差定奏下後稱疾患事故者望同臨祭出齋例論罰俸應拜

陵公卿正衙辭後並合當日出城近來因循轉不遵

守動經累日止宿于家受命不恭莫甚于此臣請申

明舊制因事酌宜計其道程前後辭發

唐會要二十

學士名目定制奏

長慶三年七月宏文館

按六典當館先有學士直學士詳正學士校理直館讐校錯誤講經博士等雖職事則同名目稍異須有定制使可遵行今請准集賢史館兩司元和中停減雜名目例其登朝五品以上充學士六品已下充直學士未登朝官一切充直宏文館其餘并請停減冀得典故不煩職業咸在

唐會要六十四

白行簡留充新置郎官奏

長慶三年十月二日度支

主客員外郎判度支案白行簡前以當司判案郎官刑部郎中韋詞近差使京西勾當和糴遂請白行簡判案今韋詞却回其白行簡合歸本司伏以判案郎官比有六人近或止四員伏請更置郎官一員判案留白行簡充

唐會要五十九

條件流貶量移輕重奏

長慶四年四月刑部

准其年三月三日起請准制以流貶量移輕重相懸貶則降秩而已流為擯死之刑部寺論理條件聞奏今謹詳赦文流為減死貶乃降資量移者却限年數

流放者便議歸還准今年三月赦文放還人其中有犯贓死及諸色免死配流者如去上都五千里外量移校近處如去上都五千里已下者則約一千里內與量移近處如經一度兩度移六年未滿者更與量移亦以一千里為限如經三度兩度量移如本罪不是減死者請准制放還如左降官未復資遇恩滿五考者請准元和十二年九月勅與量移又准今年正月德音諸色流人與減一年除贓限外滿五年即放還收敘其配流在德音已後者不在減限又天德五城流人准長慶元年正月三日制以十年為限又

准三月十二日勅縱遭恩赦不在放歸限今請待十年滿卽放歸仍任取配流日計年數不在援引德音減年之限唐會要四十一

到官淹延罰俸奏寶歷元年九月御史臺

常參官及六品以下分司官比來淹延動經累月今後常參官分司請勅下後二十日發其六品以下分司官請待臺牒到發限外若妄稱事故不發常參官聽進止六品已下官臺司舉罰兩月俸料唐會要六十

條流兩館齋郎年限奏寶歷元年九月禮部

准今年四月制當司合釐革條流兩館生齋郎資蔭

年限等據舊勅應補兩館生所用蔭第皆門地清華勳賢胄裔近者時有源流或異支屬全疏罔冒門資變易昭穆今請如有此色自本司磨勘得實坐其家長所用廕告身用司印印郎官押署更不在行用之限保官具事由申上中書門下請諸司官典檢報不實並請准法科處分其太廟郊社齋郎亦並准此處分若用廕曾經流貶未復本資或便身亡不曾申雪卽用舊廕切恐非宜請便駁放其太廟齋郎亦准此處分伏緣兩館生員闕不多請補者衆今請一家不得用兩蔭許隔二年收補每用廕補人請明置簿歷

具注所補人年名日月用本司印郎官押署至補人數足後給其告身不在用限太廟齋郎准開元六年九月勅取五品已上子孫六品清資常參官子補充郊社齋郎用祖廕官階並須五品以上用父廕須六品以上常參官及兩府司錄判司詹事府丞大理司直并有五品階者所補齋郎皆用五保其保請以六品已上清資官充其一家不得周年保兩人仍不得頻年用蔭並請准兩館生例處分唐會要五十九請停贈太子廟裸獻奏寶歷二年二月太常寺追贈文敬太子廟在常安坊惠昭太子廟在懷真坊

各置官吏四時置享禮經無文况九廟遞遞族屬爾遠推恩降殺裸獻宜停又贈奉天皇帝廟贈貞順皇后廟及永崇坊隱太子以下七室同為一廟并贈靖恭太子亦祔在此廟凡此制置皆是追崇或徇一時且非禮意日月既久祀享尋停其神主望準故事瘞于廟地庶情禮終始不失經訓請下太常禮院與百官議唐會要十九

停四陵朝拜奏上同

追尊孝敬皇帝以下四陵宜停朝拜事孝敬皇帝恭陵讓皇帝惠陵奉天皇帝順陵前件四陵昔年追尊大號皆是恩承

制緣情而行當時已不合經典今乃二時朝拜上擬祖宗竊以情禮之差過猶不及謹按禮記及歷代禮文并國朝故事皇帝旁親無服又云五代而親屬盡伏以四陵親非祖宗事無功德緣情權制禮合變更有司因循尚為常典況今宗廟之上遷世已遠尊卑降殺朝謁須停

唐會要

請當已錢充樂人衣糧奏

寶曆二年九月京兆府

伏見諸道方鎮下至州縣軍鎮皆置音樂以為歡娛豈惟誇盛軍戎實因接待賓旅伏以府司每年重陽上巳兩度宴遊及大臣出領藩鎮皆須求雇教坊音

聲以申宴餞今請自於當已錢中每年方圖三二十千以充前件樂人衣糧伏請不令教坊收管所冀公私永便

唐會要

請賜獨孤謂章服奏

寶曆二年京兆府

法曹參軍獨孤謂前件官元推問劫人賊車仲莒逐尋蹤跡得去年十月於宣平坊北外門殺人并剝人面皮賊熊元果等三人兩人緣盜馬捉獲尋准法決殺訖伏以兇惡不去輦轂難為肅清勤勞不酬官吏無以激勸其獨孤謂伏請特賜章服

南部新書

無以懲其罪...  
 其請以以...  
 而及...  
 每...  
 大...  
 業...  
 千...  
 從...

唐文拾遺卷之五十五

榮祿大夫三品頂戴前分巡廣東高廉道加四級臣陸心源輯

闕名三

覆定輟朝例奏

太和元年  
中書門下

古有當祭告喪義在申情同體過時而哭於理為乖  
 禮院所請合輟朝者各以聞喪之時明日請依餘約  
 太常寺所奏別具品列輕重進定謹按儀制令百官  
 正一品喪皇帝不視事一日又准官品令太師太傅  
 太保太尉司徒司空以上正一品太子太師太子太  
 傅太子太保以上從一品侍中中書令以上正二品



左右僕射太子少師太子少傅太子少保三京牧大  
都護上將軍統將以上從二品門下中書侍郎六尚  
書左右散騎常侍太常宗正卿左右衛及金吾大將  
軍左右神策神武龍武羽林大將軍內侍監以上正  
三品御史大夫殿中秘書監七寺卿國子祭酒少府  
監將作監京兆河南尹以上從三品緣令式舊文三  
品以上薨歿通有輟朝之制伏以君臣之間禮情所  
及事必繁于委過官則以時重輕一用舊儀或乖中  
道臣等參配色目如前其留守節度觀察都護防禦  
經畧等使並請各據所兼官爲例

唐會要  
二十五

按全文九百六十五所收覆輟朝例奏與此不同  
疑別爲一首

條陳臺參并科決令史奏

大和元年九  
月御史臺

京兆尹及少尹兩縣令合臺參官等舊例新除大夫  
中丞府縣官自京兆尹以下並就臺參見其新除三  
院御史並不到臺參亦不於廊下參見此爲闕禮尤  
甚伏請自今以後應三院有新御史等並請勅京兆  
尹及少尹兩縣令就廊下參見冀使稟奉之禮不虧  
臨制之義可守臺司令史及驅使官并諸色所由有

罪犯須科決等或有罪犯稍重者皆是愚人常態不可一一奏聞便欲隨事科舉又緣臺杖稍細以細杖而正大罪必恐兇狡不懲自今以後如有情故難容不足上陳聖聽者許臣等據所犯判決杖下數勒送京兆府用常行杖科決訖報冀得戒懼之意稍嚴奸欺之心可革

唐會要六十

囚徒稱冤便配四推奏

大和元年御史臺

伏以京城囚徒準勅科決者臣當司準舊例差御史一人監決如囚稱冤即收禁聞奏便令監決御史覆勘者伏慮監決之時各懷疑憚務求省便難究冤辭

恐至無告屈之人失陛下好生之治且臺司本定四推以讞疑獄六察職事已重不合分外領推伏請自今以後有囚稱冤者監察御史聞奏勅下後便配四推所冀獄無冤滯事得倫理

同上

三品以上官薨卒非任將相不輟朝奏

大和元年七月

太常寺

伏以近日文武三品以上官薨卒皆為輟朝其間有未經親重之官今任是列散者為之變禮誠恐非宜自今以後文武三品以上非曾任將相及曾在密近宜加恩禮者餘請不在輟朝例其餘並請依元

唐會要二



五十

圖進白虎奏 大和元年十一月河中府

當管虞鄉縣有白虎入靈峰觀瑞應圖云白虎義獸也一名騶虞王者德至鳥獸澤洞幽冥則見今并圖奏進 唐會要二十九

官吏出入人罪不得原免奏 大和二年二月刑部

伏准今年正月三日制刑獄之內官吏用情推斷不平因成冤濫者無問有賊無賊並不在原免之限又准律文出入人罪合當坐者不言有賊無賊今請准律科本罪不得原免 唐會要四十

處分諸道幕府奏 大和二年六月月中書門下

諸道觀察等使奏請供奉官及見任郎官御史充幕府貞元長慶已有勅文近見因循多不遵守然酌時議制事在變通如或統帥專征特恩開幕戎府初建軍幄籍才事關殊私別聽進止此外一切請准前後勅文處分 唐會要七十九

推勘偽出告身奏 大和二年十月二月御史臺

准勅推勘踰濫官都六十五人應取受錢物偽出告身籤符賣鑿空偽官令赴任南曹令史李寶等六人及賣鑿空偽官人許稜等共取受錢都一萬六千七

百四十貫文又據李賓等款稱去年三月已後商量  
歛錢二千貫文與吏部員外郎楊虞卿廳典温亮囑  
求楊虞卿不舉勘濫官事得楊虞卿狀虞卿忝跡郎  
署爲明天子舉僞捕奸幸無差謬今李賓之輩結黨  
稱虛而云商量歛率甚明用此致尤誰則無罪據李  
賓款本與温亮錢物囑求虞卿不舉踰濫官者若虞  
卿遂不舉勘則小吏卜射計行今虞卿檢舉僞官牒  
臺司推勘於公事足以自明緣温亮在宅居住其於  
李賓處取受虞卿無由得知檢下不明伏候嚴責册  
六百三  
十八

實陳刺史善狀奏

大和三年五月  
中書門下

增秩賜金代有故事前史所載得者甚希近日方鎮  
所奏人數漸多自今已後刺史在任政績尤異檢勘  
不虛者觀察使具事狀及所差檢勘判官名銜同奏  
若他時察勘不實本判官量加削奪觀察使奏聽進  
止所陳善狀並須指實而言如增加戶口須云本若  
千戶在任增加若干戶如稱墾闢田疇則云本墾田  
若干頃在任已來加若干頃並須申所司附入簿籍  
如荒地及復業戶自有年限未合科配者亦聽申奏  
言合至某年並收租賦如稱營田課則所陳須云本

合得若干萬石在任已來加若干萬石其所加配斛斗便請准數落下支所供本道本軍斛斗數如不是供本軍本道斛斗則申所司收管支遣以憑考覆不得虛為文飾謬有薦論

唐會要六十八

內外官不論考年奏

大和三年五月申書門下

伏以建官蒞事曰賢與能古之王者用此致治不聞其積日以取貴踐年而遷秩者也况常人自有常選停年限考式是舊規然猶慮拘條格或失茂異遂於其中設博學宏詞書判拔萃三禮三傳三史等科目以待之今不限選數聽集是不拘年數考數非擇賢

能之術也故經國治民惟繫人才黜幽陟明在課職業據元和二年五月十八日具敕敕內常參官並限年考各與遷轉則官修者屈滯職曠者僥倖恐非朝廷循名責實之意積課語勞之道頻奉進止數遣商量須令百吏勤官得人舉直措枉行於授受之際伏望從今以後內外常參官並不論年考議事而遷位位均以才均均以期均均然後以日月班之而第用之則冀有司竭力盡知務治其職而以起功唯御史臺刑憲是司責任頗重其三院御史望約舊敕例比量處分

唐會要五十四

諸道所奏憲官特置考限奏

大和三年十二月中書門下

伏准五月八日勅節文諸道諸使奏判官所奏雖官資相當並請限曾任正官經六考以上者比擬監察侍御史九考以上者與比擬殿中侍御史以上節級各加三考如曾諸色登科超資授官者不得在此限所奏憲官特置考限以防僥倖深合至公然節文之中或有未盡臣等再四商量如京六品以上清資官并兩府判官及進士出身平判入等諸色登科授官人不在此限其在使府及監察已上者亦任準元和七年八月二十二日勅節文依月限處分餘望准前

勅施行

唐會要七十九

三院御史置祇候院奏

大和四年三月中書門下

三院御史盡入到朝堂前無止泊處請置祇候院屋知祿御史元借門下直省屋後簷權坐知巡御史元借御書直省屋後簷權坐每日早入至巳時出出入前後並本所由自門下直省院西京兆尹院東有官地東西九十尺南北六十尺請準長慶元年八月於中書南給官地度支給錢置僕射祇候院例給此地充三院御史祇候院請度支給錢一千貫文臺司自勾當從便起造伏以御史風憲之職行止有常朝堂

祇事每日須入從前假借不違啟居或與吏伍相參  
或當食無所令伏請前件地名及起舍價伏乞聖慈  
允臣所請

唐會要  
六十二

韓巨川等進狀奏

大和四年  
四月都省

湖州百姓韓巨川及庾威男道彰進狀稱庾威緣定  
戶左降及錄事參軍縣令等黜責事勅付尙書省四  
品已上官集議

冊府四百  
七十四

推勘刑獄時限奏

大和四年四  
月御史臺

諸司諸使及諸州府縣并監院等公事申牒臣當臺  
各令遵守時限并臣當司行勘事多緣準勅推勘刑

獄或是遠方人事有冤抑凡於關繫盡須勘逐事節  
不精卽慮滯屈比來行牒有累月不申兼類牒不報  
者遂使刑獄淹恤懼涉慢官其間或有口且禁申動  
經時月者若無條約弊恐轉深臣等今勘責各得遠  
近程限及往復日數限外經十日不報者其本判官  
勾官等各罰三十直如兩度不報者其本判官勾官  
各罰五十直如三度不報者其本判官勾官各罰一  
百直如涉情故違勅限者本判官勾官各罰考功書下  
考如經過所出輒有停滯其所由官等節級別舉處  
分其間如事須轉行文牒諸處追尋亦須具事由先

報唐會要

六十

諸道薦送軍將奏

大和四年四月  
中書門下

自元年以來頻有討伐諸道薦送軍將其數漸多臣等商量應諸道軍將官至常侍大夫職兼知兵馬使都押衙功績顯著本道官職未高才能可錄所在軍鎮合驅使自今後軍官未至常侍大夫職兼都虞候都知兵馬使都押衙者不在薦送限但仰本道節度使看其功績顯著與改轉職已至高者檢校官兼官宜與奏改如有功績殊異允合不次超擢者即任別具事跡聞奏亦不在便薦送限又應諸方鎮或因移

易停罷其依隨從元從軍將只合本道量才驅使不情願住者一任東西不合更來朝廷別求僥倖

唐會要七

九十

停廢三衛資蔭奏

大和四年  
五月兵部

伏以三衛出入禁署番署子弟期于恭恪近日頑弊皆非正身諸衛公然納資訪聞亦不雇召土庶假廕混雜搢紳隙既一開姦濫全入實宜杜絕以序彝倫其資廕三衛並請停廢冀清流品式茂皇猷

唐會要七十

知制誥滿年正授奏

大和四年七  
月中書門下

伏以制誥之選參用高卑遷轉之時合係勞逸頃者

緣無定制其間多有不均准長慶二年七月二十七日敕始令自員外以上及卑官知者同以授職滿一年後各從本秩遞與轉官如至前項正郎即以周歲為限皆計在職日月以為等差不論本官年考頗叶通理凡是因職轉敘皆與此文相當其本官已是前行郎中年月已深方被獎用即授官數月未合正除比類舊制却成僥倖將垂永久須有商量自今以後從前行郎中知者并不許計本官日月但約知制誥滿一周年即與正授其從諫議大夫知者亦宜準此即遲速有殊比類可遵并請依長慶二年七月二十

七日敕處分

唐會要五十五

刺史缺人分析聞奏奏

大和四年八月御史臺

謹按大歷十二年五月一日敕刺史有故及缺使司不得差攝但令上佐依次知州事其上佐等多非其才亦望委外道使臣精加銓擇不勝任者具以狀聞昨者宣州觀察使于敖所差周墀知池州若據勅旨便合奏劄今勘其由長史司馬並在上都守職有錄事參軍顧復元在任若不重有條約所在終難守文伏請自今已後刺史未至上佐闕人及別有勾當處許差錄事參軍知州事如錄事參軍又闕則任別差

判官仍具闕人事由分析聞奏并申中書門下御史臺所冀詔旨必行繩違有據

唐會要六十八

羨餘充公條件奏

大和四年九月比部

准大和三年十一月十日赦文天下州府迴殘羨餘准前後赦文許充諸色公用刺史每被舉按即以公坐論贓其應合用羨餘錢物並令明立條件散下州府者謹具起請條件如後應有城郭及公廨屋宇器械舟車什物等合建立脩理須創置添換者或有公私使客兼遇徵拜朝官送故迎新舊例合有供應宴錢贈貺者或官屬將校所由等有巡檢非違追捕盜

賊須行賞勸合給程糧者或百姓貧窮納稅不逮須有矜放要添填元額者或遇年豐穀熟要收糴貯備以防災歉者並任用當州所有諸色正額數內迴殘羨餘錢物等如不依此色即同贓犯其所費用者並須立文案以憑勘驗

唐會要六十八

按全文九百六十六所收請定殘欠羨餘物條件奏與此不同

公私行李勒依紀律奏

大和四年十月御史臺

伏準六典故事外官授命皆便道之官蓋緣任闕其人則朝廷切於綜理近日皆顯陳私便不顧京國越



理勞人逆行縣道或非傳置創設供承况每道館驛有數使料有條則例常踰支計失素使偏州下吏何以資陪又準假寔令官五考一給拜掃假今借稱幸從便路願謁粉榆則是展墓足以因行赴官皆由枉道臣今月五日已於延英面奉伏幸聖旨令將伏承狀乞起今公私行李勒依紀律敢有違越請委所司論列

唐會要  
六十一

止絕諸官改名奏

大和五年三月  
御史臺

伏見在京諸司兼諸道方鎮每奏請賓僚及州縣官等改名多言與近族從伯叔名同勅旨皆允在於典

法宜爲重難若於宗族之中服屬又近創名之日合慮有妨而曾不是思但將自便紊朝廷之典章滋選部之姦濫苟無懲革實爲倖門或以孤更名禮經不可繫於名教合守格言伏請嚴示勅文俾其止絕諸司自今已後不得輒奏聞如有事故必須爲改卽請具所奏同名入下付有司以出身以來官銜切加磨勘事實顯者方可聽

冊府五  
百十六

截耳進狀先決四十奏

大和五年三月  
御史臺

應截耳進狀人准開元十三年八月二十四日勅比來有小小訴兢卽自刑害自今已後犯者先決四十

然後勘當又准建中元年三月十一日勅節文自今  
 已後除事有不合所司論者卽任奏聞其餘不得妄  
 有進狀如有違犯及自刑害者卽令所司送官准法  
 處分仍委臺府具前後格勅分析告示者伏以近日  
 截耳論訴其徒實繁且將自刑以冀上達未必皆負  
 其屈州府不與申論臣謹詳前後勅制如前伏請自  
 今已後有如此色者並准元勅付司先決四十後推  
 勘宜令待推勘無理卽本犯之外准元勅處分  
 六十

刺史限發赴任奏

大和五年五月御史臺

應諸州刺史謝官後限發赴任日准敕例刺史謝官  
 後不計近遠皆限十日內發伏以刺史治民之官分  
 陛下憂受命之後固宜速行或以道途稍遙私室貧  
 乏限內不能辦集事宜須假故淹留虛懸促期多不  
 遵守今請量其遠近次第限日應去京一千里內者  
 限十日二千里內者限十五日三千里內限二十日  
 三千里以外者限二十五日如限內遇延英不開亦  
 請准常例進狀候進止便發更有妄託事故逗留伏  
 請當時奏聞量加懲責其貶授刺史卽請准舊例發  
 遣不依此限所冀事得中道久而不隳

唐會要六十八

閉塞向街門戶奏大和五年七月左右巡使

伏准令式及至德長慶年中前後勅文非三品已上及坊內三絕不合輒向街開門各逐便宜無所拘限因循既久約勒甚難或鼓未動即先開或夜已深猶未闕致使街司巡檢人力難周亦令奸盜之徒易為逃匿伏見諸司所有官宅多是雜賃尤要整齊如非三絕者請勒坊內開門向街門戶悉令閉塞請准前後除准令式各合開外一切禁斷唐會要八十六整肅禁街奏大和五年七月左右街使伏見諸街鋪近日多被雜人及百姓諸軍諸使官健

起造舍屋侵占禁街切慮停止好人難為分別今除先有勅文百姓及諸街鋪守捉官健等舍屋外餘雜人及諸軍諸使官健舍屋並令除拆所冀禁街整肅以絕奸民同上

進士先試帖經奏大和七年八月禮部

進士舉人先試帖經并畧問大義取經義精通者次試議論各一首文理高者便與及第其所試詩賦並停者伏請帖大小經各十帖通五通六為及格所問大義便與習大經內准格明經例問十條仍對眾口義伏准新制進士畧問大義緣初釐革今且以通三

通四爲格明年以後並依明經例其所試議論請限  
五百字以上爲式

唐會要  
七十六

私假不給公券奏

大和八年八月門下省

常參官私事請假從來準例並給券牒今商量或緣  
家事乞假各申私志須約公費自今後應有此色假  
官並任私行門下省不得給公券如或事出特恩不  
在此限

唐會要  
六十一

常參假多奪俸奏

大和八年九月御史臺

文班常參官舊例每月得請兩日事故假今請三  
仍不得在盡入衆集并頭朝日一品二品官如合朝

不朝及盡入衆集不到臨朝時請假等並請假舊例  
每季終仍具請事故假日錄狀聞奏兼申中書門下  
文武常參官每月終比校其中請事故假多人三品  
六品各罰兩人四品五品人數稍多各罰三人請各  
奪一月俸如合罰人數稍多卽從下罰亦不過兩三  
人及三人如實疾患已連請假十日以上爲衆所知  
不在此限每至次月具狀申中書門下文武常參應  
暮年喪假者除准式假滿連許請三日事故假仍五  
個月內每朔望日各許請事故假一日其大功喪假  
者准式假滿連許請事故假兩日仍三個月朔望日

各許請事故假一日 唐會要八十二

水旱開倉賑貸奏 大和九年二月 月中書門下

常平義倉本於水旱以時賑卹州府不詳文理或申省取裁或候奏進止自今已後應遭水旱處先據貧下戶及鰥寡惇獨不濟者便開倉准元勅作等賑貸訖具數申報有司如或水旱尤甚米麥翔貴亦任准元勅減價出糶熟時糶填委諸道觀察使各下諸州重令諸委 冊府五百二

擇清慎進奏官奏 大和九年五月 月中書門下

準大和七年七月十四日勅諸道進奏官令揀擇清

慎人充非因過犯不得停罷如方鎮自要腹心委寄任於本道差見任官充又準大和元年九月十九日勅不許授別官今日以後並請準元和勅處分如邊上無俸料處只得授近處官亦不得占江淮好闕其新進奏官仍須守職二年後無敗闕方得奏官 唐會要七

九十

朝使參臺官奏 大和九年八月 御史臺

應文武朝參官新除授及諸道節度觀察經畧防禦等使及入朝赴鎮並合取初朝謝日先就廊下參見臺官然後赴正衙辭謝或有於除官之日及朝覲到

城忽遇連假三日以上近例便許于宣政門外見謝  
訖至假開亦須特到廊下參臺官者請自今以後如  
遇連假已見謝訖至假開亦須特到廊下參臺官

唐會要  
十五

節使參辭停帶器仗奏

大和九年十二月  
左僕射合諸道

諸節使新授具巾抹帶器仗省中參辭兵部尚書侍  
郎者伏以軍國異容古今定制苟不由舊務祈改常  
未聞省閣之門忽入弓刀之器伏請停罷如須參謝  
任具公服到本州縣後交割兵馬詣實申奏

陌刀利器納軍器使奏

唐會要  
七十九  
開成元年三月  
皇城留守

城內諸司衛所管羽儀法物數內有陌刀利器等伏  
以臣所管地附近宮闕兼有倉庫法駕羽儀分投務  
繁守捉人少前件司衛皆有刀槍防虞所管將健並  
無寸刃其諸司衛所有陌刀利器等伏請納在軍器  
使如本司要立仗行事請給儀刀庶無他患

唐會要  
七十二

擇差千牛中郎奏

開成元年五月  
中書門下

入閣升殿接狀中郎準故事合是左右千牛衛中郎  
比緣用人未精去年一時除縣主壻四人臣昨日令  
勘尋左仗一人身亡準舊例便是金吾仗司於諸衛  
中郎差替並不申中書門下臣等商量從今以後左

右千牛中郎將闕人及在假故遇入閣日望令金吾  
司申中書門下於南省郎官中權定擇差訖先具名  
銜申中書門下如臨日揀擇差遣不及則闕而不補  
冀免乖雜其郎官兼中郎有假故都督便於郎官中  
權定充替仍先具狀申中書門下

唐會要  
七十一

犯鹽依貞元舊條奏

開成元年閏五  
月七日鹽鐵使

應犯鹽人準貞元十九年大和四年已前勅條一石  
已上者止於決脊杖二十徵納罰錢足大和四年八  
月二十已後前鹽鐵使二石以上者所犯人處死其  
居停并將舡容載受故擔鹽等人並準犯鹽條問處

分近日決殺人轉多權課不加舊今請却依貞元舊  
條其犯鹽一石以上至二石者請決脊杖二十補充  
當據捉鹽所由待捉得犯鹽人日放如犯三石已上  
者即是囊橐奸人背違法禁請決訖待瘡損銅身牒  
送西北邊諸州府効力仍每季多具人數及所配去  
處申奏挾持軍器與所由捍敵方就擒者即請準舊  
條同光火賊例處分

唐會要  
八十八

刺史延英對了奏發奏

開成元年閏五  
月中書門下

伏准舊例刺史授官後皆於限內待延英開日候對  
奏發日詳度朝旨蓋治人之官欲陛下觀其去就察

其言語亦所以杜塞宰相陳情故除刺史並往往進  
狀便辭蓋恐對奏之時錯失乖誤自今已後除刺史  
並望延英對了日奏發地近限促不過坐日亦望許  
於臺司通狀待延英開日辭了進發

唐會要  
六十八

四庫書隨日校勘奏

開成元年七月分察使

秘書省四庫見在新舊書籍共五萬六千四百七十  
六卷並無文案及新寫文書自今已後所填補舊書  
及別寫新書並隨日校勘並勒創立文案別置納歷  
隨月中臺並外察使每歲末計課申數具狀聞奏

唐會  
要三五  
十五

田畝納粟貯義倉奏

開成元年八月戶部

應諸州府所置常平義倉伏請起今後通公私田畝  
別納粟一升逐年添貯義倉斂之至輕事必通濟歲  
月稍久自致充盈縱逢水旱之災永絕流亡之慮

冊  
五百

採訪刺史縣令政事奏

開成元年八月  
中書門下

致治親民屬在守宰朝廷近日命官頗加推擇從今  
以後望令諸觀察使每歲終具部內刺史縣令司牧  
方策政事工拙上奏其有教化具修人知敬讓賊盜  
逃去遺賂不行刑獄無偏賦稅平允撫綏孤弱不虐



幼賤姦吏黠胥侵牟止絕田疇墾闢逃戶歸復道路  
 平治郵傳修節府無留事獄去繫囚紕罔繩違嫉惡  
 樹善以公滅私絕去貨殖夙興夜寐宴戲省少人無  
 謗議家有蓋藏是謂循良之吏愷悌君子其能備此  
 具美者仰以其尤薦聞朝廷特加褒賞增秩改章徵  
 受顯重如或數科之中粗有提舉勤恪不怠處事無  
 闕者仰以次等薦聞量加寵賞偕留未替以候成績  
 其有味此政經所向無取循資待錄無補於治散材  
 凡器長在人上亦仰以實奏聞當請移於散秩如有  
 貪殘黷貨枉法受贓冤訴不伸拷答無罪有一於此

具狀以聞當加峻刑投諸荒裔賞善懲惡期於必行  
 椽曹邑佐善惡特異者亦仰聞狀請頒示四方專委  
 廉察仍令兩都御史臺併出使郎官御史及巡院法  
 憲官常加採訪具以事狀奏申中書門下都比較諸  
 道觀察使承制勤怠之狀每歲孟春分析聞奏因議  
 懲獎唐會要六十八  
 兩府司錄尉知捕盜賊奏開成元年十月中書門下  
 兩畿及兩京奏六品以下官除勅授外並吏部注擬  
 准大和五年正月二十六日勅中書門下奏近勅隔  
 絕諸司奏六品以下官寬免占吏部闕員亦稍絕邪

濫其兩府司錄及尉知捕賊盜皆藉幹能用差專任吏部所注或慮與事稍乖自今已後京兆府及河南府司錄及尉知捕賊盜據官資合入者充其餘並准大和元年九月十九日勅及大和四年五月七日勅處分

唐會要七十五

諸道押衙不得過侍御史奏

開成元年十一月

准大和十一年七月二十六日勅諸道節度使下都押衙都虞候約五年以上方得改轉押衙兵馬使約七年以上方得改轉三萬人以上軍兵每年許奏四人其序遷合與憲官者以曾歷兩任奏授賓詹者與

監察以次遷序止於侍御史其御史中丞以上官並須因有戰功方得奏請諸道團練下萬人以上軍所奏不得過殿中侍御史如未有憲官者不在奏限萬人以下軍不因戰功並不得奏論

唐會要七十九

量留運米備江淮飢

開成元年十二月

據江淮留後盧綱以江淮諸州人將阻飢請于來年運米數內量留收貯至春夏百姓飢乏之際減價出糴收價待熟補之無損于官有利于人

冊府五十二



事比於今日頗謂不同聖朝授任推公惟才是急輟諸上選分佐戎行職則稍尊命則稍重而又才人涉歷練達武經出入往來便堪獎用是朝廷之所利誠方鎮之得人希古濟今匪宜專恡酌于臨事可否在茲臣等商量諸節度觀察都團練使朝中素有相知者許奏一人充副使章服準大和三年五月八日勅如素無相知不奏亦聽其方鎮帶相及自廟堂平章事出鎮者任約舊例奏署庶使藩方益重試任程才其今日以前應奏署勅已行者雖關前勅人數至少式遵成命又難追移伏請自此已後不得違越

唐會要七

九十

駁張克勤迴授外甥官奏

開成二年二月吏部

准制請敘一子官張茂昭男左武衛大將軍克勤進狀稱男小未堪授任請迴與外甥准起節文只許迴與周親克勤又奏承前諸家請迴授外甥並蒙允許中書省牒吏部詳斷左司員外郎權判吏部廢置裴夷直斷一子官恩在報功貴延賞典若無已子許及周親今張克勤自有息男妄以外甥奏請移於他族知是何人儻涉賣官實為亂法雖援近日勅例難破著定節文國章既在必行宅相恐難虛授具狀上中

書門下并牒中書省克勤所請不允

册府六百三十一

中謝官不必候延英開日奏

開成三年二月御史臺

宜自今以後遇延英開擬中謝官委司臺立一日依

官班具名列奏如先奏即不在中謝限

唐會要二十五

停罷退朝祇候奏

開成三年二月書門下

僕射尚書侍郎左右丞五監九寺大卿監准開成元

年三月勅每遇延英開並令候對如入閣日班過後

各於紫宸殿前東西松樹下依位立本司有公事即

聞奏者伏以兩衙坐日宰臣及次對官奏事比及退

朝已是辰巳之間若更祇候即廢闕公務今日延英

面論並請停罷如須顧問隔宿及臨時宣召不必稽

遲

唐會要二十五

宰相出鎮奏請朝官五人奏

開成三年四月書門下

宰相帶平章事出鎮應朝官充使府職事任約舊例

奏署使藩方益事委任程才謹詳勅文意在明許亦

不定言人數及所請職名臣等商量起今以後宰相

自朝廷出鎮奏請朝官及刺史佐幕前後更五人數

內有遷轉停罷者或須填替任更奏來如或辟用他

官不奏亦得官至侍御史以上者即許奏章服便為

常例庶可通行

唐會要七十九

刺史替人未到雜給俸料奏

開成三年五月  
中書門下

舊制刺史已除替人未到依前管一應務并給俸料待替到交割便聽東西據山南道所奏刺史得便令牒州停務別差官知州事待到交割方可東西臣以爲刺史祿俸固薄留滯可矜又嶺南諸管及福建黔府皆是遠僻須有商量並請除到後未交割以前據俸料雜給之中三分支一以資其停費惟戒所由不可比例

唐會要  
六十八

官典犯贓分別公私奏

開成三年  
五月刑部

准今年二月八日赦書官典犯罪不在此限者伏以

律載贓名其數有六官典有犯並列科則其間有入已者罪卽懸別今請監臨主守將官物私自貸用並借貸人及百端欺詐等不在赦限如將官物還充公用文記分明者並請原免

唐會要  
三十九

舉人納狀五人相保奏

開成三年十  
月中書門下

朝廷設文學之科以求髦俊臺閣清選莫不由茲近緣覈實不在于鄉閭趨名頗雜于非類致有跋扈之地情計交通將澄化源在舉明憲臣等商量今日以後舉人于禮部納家狀後望依前五人自相保其衣冠則以親姻故舊久同遊處者其江湖之士則以封

壤接近素所諳知者為保如有缺孝弟之行資朋黨之勢跡由邪徑言涉多端者並不在就試之限如容情故自相隱蔽有人糾舉其同舉人並三年不得赴舉仍委禮部明為戒勵編入舉格

唐會要七十六

皇太子喪公除奏

開成三年十月中書門下

皇太子今月十六薨自十六日舉哀二十八日公除臣等參詳惠昭太子例蓋緣在公除內今從舉哀日數至二十八日十三日滿合公除不合更待輟朝日滿臣等商量望令百寮二十九日概行參假便赴延

英奉慰

唐會要三十八

皇太子喪停諸祠祭奏

開成三年十月太常禮院

皇太子薨禮儀至重諸祠祭除天地社稷之外並合權停其天地社稷祭日懸而不樂虞祭已後却依常式

唐會要卷四

請廢讓皇帝廟奏

開成四年中書門下

伏以讓皇帝睿宗之子元宗之兄位止列藩功非及物元宗情深同氣恩起權宜贈王者之尊名申友于之私分別構廟宇以時烝嘗求之古先則匪經制比及肅宗之代歲月未深禮儀使杜鴻漸言其不可四時享獻從此並停每至禘祫之年猶令一祭伏以禘

裕之禮義理甚明裕謂合祭祖宗禘謂審諦昭穆讓  
帝親非正統名是贈加久從禘裕頗爲乖爽臣等又  
以睿宗之尊崇元宗之功德皆以親盡祧去藏主于  
夾室之中而讓帝宗祀依然廟宇仍舊曾無昭穆之  
序而有禘裕之儀惟情與理俱所未可況自建立于  
今九廟比章懷孝敬名位猶輕與德明興聖尊卑頓  
異豈可因循不毀享獻無窮者也伏以今年夏禘祭  
俯臨輒敢舉明特希廢革如或以臣等所見不至乖  
殊望下禮官詳議聞奏

唐會要

准廢毀讓皇帝廟奏

開成四年  
太常寺

臣等伏以讓皇帝追尊位號恩出一時別立廟祠不  
涉正統既非昭穆禘裕所及又無子孫享獻之儀親  
盡則疏歲久當革杜鴻漸所議禘裕之月時一祭者  
蓋以時近恩深未可頓忘故也今睿宗元宗既已祧  
去又文敬等七太子其中亦有追贈奉天承天皇帝  
之號皆已停廢則讓皇帝之廟不宜獨存臣等參詳  
伏請准中書門下狀便從廢毀沿情定禮實謂協宜

唐會要

交割廊下食料錢奏

開成四年五  
月光祿寺

當司伏准大曆八年四月十八日勅令主辦百寮廊



下賜食仍委御史臺勾當至於補置所由計料費用  
卽是當司本事自從臺司自置都一人管計今造膳  
支辦盡非有司闕敗罪歸當寺比於臺司論請因循  
竟未却還今御史中丞丁居晦深知前弊悉還所職  
其廊下食料錢勅令見於臺司交割

唐會要  
六十五

牒光祿寺部置人吏奏

開成四年  
御史臺

伏准大曆八年元勅任委御史臺勾當本慮事有闕  
違自後因循遂成侵占人吏雖隸光祿寺補署多出  
臺司謹詳勅旨根尋應申歸有司方可求理已牒光  
祿寺自部置若有闕失責在本司仍依前差御史一

人充使勾當

唐會要  
六十五

五經博士定爲五品奏

開成四年二  
月中書門下

伏以朝廷興復古制置五經博士以獎顯門之學爲  
訓胄之資必在得人不限官次今定爲五品俸入四  
方有經術相當而秩卑身賤者不可以超授有官重  
而通詩達禮者不可以退資從今已後並請勅本色  
人中選擇據資除授令兼博士其見任博士且仍舊

唐會要  
六十六

上佐權充知州奏

開成四年三  
月中書門下

嶺南小州多是本道奏散試官及州縣官充司馬知

州事不三兩考便請正除僥倖之門莫甚於此須作定制令其得中應奏授上佐知州事起今已後一周年在本任無破缺即任奏請充權知刺史宦途之內猶甚徑捷仍須俟一周年考不得將兩處相續唐會要六十八

勒停諸道行軍司馬參謀奏

開成四年六月  
月中書門下

諸道節度使參佐自副使至巡官共七員觀察使從事又在數內雖大藩雄鎮有藉才能而邊鄙遐方豈易供給况行軍之號本繫出師參謀之職尤是冗長其行軍司馬及參謀望勒停省見任人如本道有相

當職員任奏請改轉其餘官序稍高者許隨表赴京到日量才獎授郎御史以下各令冬薦節度判官舊額雖本兩員近日諸道亦不盡置起今已後望以一員為定其課料等本是供軍數內戶部不可更收唐會要七十九

勒停長定綱奏

開成四年十  
月中書門下

准開成元年三月十日勅宜令兩稅州府各於見任官中揀擇清強長定綱往來送五萬至十萬為一綱綱官考滿本州便與依資奏改通計十年往來優成與依資選遷當處令錄長馬如本州官資望無相當

者許優成奏他處官者伏以諸道有上供兩稅錢物者大小計百餘處舊例差州縣官充綱亦不聞過有敗闕若依勅以長定綱爲名則命官不以才能賦祿難憑僦運况江淮賦大州每年差綱十餘輩若令長定則官員長占於此流若祇取數人綱運當虧其大半臣等商量長定綱起來年已後勒停臣又准開成元年已後旨條州縣官充綱送輕貨四萬已上無欠少不逾程限者書上考十萬減一選其餘優獎猶以稍輕送二萬至五萬依舊書上考五萬至七萬與減一選七萬至十萬減兩選十萬至十五萬減三選如

一度充綱優勞未足考秩之內情願再差者旨條先有約絕此後望令開許如年少及材質不當但令准舊例以課料資陪不必一例依次差遣其餘並望准前旨條處分

唐會要八十四

請申明國忌日徹樂廢公奏

開成四年十月御史臺

請國忌日天下依舊不舉樂不視事不鞭笞伏以道釋二教澶漫虛無陛下靡所歸依誠契至理但以列聖忌日行香及茲修崇示人廣孝兼以天下州縣不舉樂不視事不鞭笞以此海內蒼生常知列聖廟號今既停罷行香之後勅內又無其日徹樂廢公止行

如舊之文伏恐遐遠之地迷其所向便與居常之日  
率皆無殊臣思此事終闕聖慮禮曰君子有終身之  
憂而無一朝之患故忌日不樂謂不舉吉事也伏願  
陛下聖睿留想若以設齋資福事損不經起今罷之  
已有詔旨其曰天下州縣不舉音樂不視公事不行  
鞭笞伏請重下明制依前遵守則凡在遐陬逮于蠻  
貊不忘廟號有裨孝禮之源

唐會要  
二十三

宣懿皇太后祔廟饗禮奏

開成五年  
太常禮院

宣懿皇太后祔廟伏惟開元禮有皇后祔廟牲牢樂  
懸與太廟享一室禮同今宣懿皇太后饗禮伏請宣

下

唐會要  
十八

不移福陵奏

開成五年二  
月中書門下

園寢已安神道貴靜光陵墓已二十餘載福陵近又  
修崇竊惟孝思足彰嚴奉今若載因合祔須啟二陵  
或慮聖陵不安未合先旨又以陰陽避忌實有所疑  
不移福陵實合典禮

唐會要  
二十一

慶陽節設僧齋奏

開成五年四  
月中書門下

請以六月一日為慶陽節休假三日著于令式其天  
下州府每年常設降誕齋行香後更令以素食宴樂  
惟許飲酒及用脯醢等京城內宰臣與百官就詣大

寺共設僧一千人齋仍望田里借教坊樂官充行香慶讚各移本厨兼下令京兆府別置歌舞唐會要二十九

宣懿皇太后寶冊宜藏廟中奏

開成五年六月太常禮院

問冕旒璽綬歸藏何處徐邈答云臣按太始元年追尊四年太后崩及開陵合葬其綬藏于陵中是元不埋之也臣謂今藏于廟中宜合前事准國朝故事讓皇帝及贈諸太子寶冊並隨神主于廟中安置唐會要十

加給課料及時支遣並許遠官借俸奏

會昌元年年中書

門下

河東隴州鄜坊邠州等道比遠官加給課料河東等道或與王舊邦或陪京近地州縣之職人合樂為祇緣俸課寡薄官同比遠伏準元和六年閏十二月十二日及元和七年十二月二十日勅河東鳳翔鄜坊邠州易定等道令戶部加給課料錢共六萬二千五百貫文吏曹出得平流官數百員時議以為至當自後訪聞戶部所給零碎兼不及時觀察使以其虛折皆別將破用徒有加給不及官人近地好官依前比遠臣等商議伏望今日以後令戶部以實物仍及時

支遣諸道並委觀察判官專判此案隨月加給官人不得別將破用如有違越觀察判官遠貶觀察使奏取進止選人官成後皆于城中舉債到任填還致其貧求罔不由此其今年河東隴西鄜坊邠州新授比遠官等望許連狀相保戶部各借兩月之數加給料錢至支給時尅下所冀初官到任不滯息債衣食稍足可責清廉

唐會要九十二

度支戶部文案本司郎官分判奏會昌元年二月伏以南省六曹皆有職分若各守官業即不因循比來戶部度支兩司尚書侍郎多奏請諸行郎官判錢

穀文案遂令本司郎吏束手閑居至於廳事皆為他官所處臣等商量請自今已後其度支戶部錢穀文案望悉令本司郎官分判不在更請諸行郎官限仍委尚書侍郎同諸司例便自於司內選擇差判不必更一一聞奏其戶部行郎官仍望委中書門下皆選擇與公務相當除授如本行員數欠少亦任於諸行稍閑司中選其才職資序相當者奏請轉授所冀蒞事有常分官無曠庶或可以革從權

唐會要五十九

司直評事出使賫用廢印奏

會昌元年六月大理寺

當寺司直評事應准勅差出使請廢印三面比緣無

出使印每經州縣及到推院要發文牒追獲等皆是自將白牒取州縣印用因茲事狀多使先知為弊頗深久未釐革臣今將請前件廢印收鑱在寺庫如有出使官便令賫去庶免刑獄漏泄州縣煩勞

唐會要六十六

請鑄出使印奏

會昌元年十一月大理寺

臣於六月二十八日伏緣當寺未有出使印每准勅差官推事皆用州縣印刑獄漏泄遂陳奏權請廢印三面伏以廢印經用年多字皆剝缺臣再與當司官吏等商量既為久制猶未得宜伏請准御史臺例置前件出使印其廢印却送禮部

唐會要六十六

條流喪葬奏

會昌元年十一月御史臺

請條流京城文武百寮及庶人喪葬事三品已上輜用闕轍車方相魂車誌石車並須合轍油憶流蘇等任准令式挽歌三十六人六鐸六嬰明器並用木為之不得過一百事數內四神不得過一尺五寸餘人物等不得過一尺昇止七十昇內外官同五品已上輜車及方相魂車等同三品不得置誌石車其油憶等任准令式挽歌十六人四鐸四嬰明器不得過七十事數內四神不得過一尺二寸餘人物不得過八寸昇止五十昇內外官同九品已上輜車魂車等並

卷五十一  
三  
同合轍車其方相魁頭並不得用楮車及誌石車其  
輜車除油幟流蘇等各准令式外不得用繒綵結絡  
兼銀器裝飾挽歌一十人一鐸二翼明器不得過五  
十事四神不得過一尺餘人物不得過七寸昇止三  
十昇內外官同散試官等任于階官之中取最高品  
第五品已上遞降一等六品已下依令式有品廕家  
子孫未有官者用三品已上廕者降三等用五品已  
上廕者降二等用八品已上廕者降一等用九品者  
不降仍並須是祖父母廕內外官同工商百姓諸色  
人吏無官者諸軍人無職掌者喪車魁頭同用合轍

車喪車不用油幟流蘇等飾兼不得以繒綵結絡及  
金銀飾挽歌鐸翼並不得置喪車之前不得以鞍馬  
爲儀其明器任以瓦木爲之不得過二十五事四神  
十二時並在內每事不得過七寸昇十昇伏以喪葬  
之禮素有等差士庶之家近罕遵守踰越既甚糜費  
滋多臣忝職憲司理當禁止雖每令舉察亦怨謗隨  
生苟全廢糾繩又譏責立至總以承前令式及制勅  
皆務從儉省減刻過多遂令人情易踰禁限將求不  
犯實在稍寬臣酌量舊儀創立新制所有高卑得體  
豐約合宜免令無知之人更懷不足之意伏乞聖恩



宣下京兆府令准此條流宣示一切供作行人散榜  
 城市及諸城門令知所守如有違犯先罪供造行人  
 賈售之罪庶其明器並用瓦木永無僭差以前條件  
 臣尋欲陳論伏候進止承前已于延英具奏訖

唐會  
要三

八十

盜賊計贓至絹三疋處極法奏

會昌元年十  
二月都省

准開成五年十二月十四日中書門下奏准律竊盜  
 五匹以上加役流今自京兆河南尹逮于牧守所在  
 為政寬猛不同或以百錢以下斃踏或至數十千不  
 死輕重既違法律多以收禁為名法自專行人皆異

政然禁嚴則盜賊屏息閭里皆安政緩則攘竊盜行  
 平人受弊定其取捨在峻典刑自今已後天下州府  
 竊盜賊計贓幾貫須處極法臣等商量望委中書門  
 下五品已上尚書省四品已上御史臺五品已上與  
 京兆尹同議奏聞仍編入格令所冀巽懦者政無寬  
 縱剛戾者刑不至殘各奉朝章法歸畫一其強盜賊  
 法律已重不在此限仍委出使郎官御史及支鹽鐵  
 巡院察訪務令遵守不得隳違者伏以竊盜本無死  
 刑遂使刑法不一臣等既奉詔旨敢不盡心臣請自  
 今已後入不應竊盜賊贓至絹三疋即處極法如未

滿二正即任節級科處不失罪人其計贓數即請律以所在估絹為定其兩京及軍府浩穰之地或事繁一時制斷有異則請許量情定罪務在得中自然法禁不虧刑名可守

唐會要三十九

精選法官奏

會昌二年十月中書門下

伏見衛覬稱刑法者國家之所貴重而私議之所輕賤獄吏者百姓之所懸命而選任之所卑下王政之弊未必不由此也臣等商量望委中書門下精擇法官選任不得在文學官之後如有缺員兼委大理卿自舉所知舉不得人顯加殿罰向後御史臺取御史

數至三人以上即須取法官一人所冀刑法之官皆

知勸勵

唐會要六十六

太和公主到日立班奏

會昌三年二月太常禮院

太和公主到日百寮于章敬寺門立班舊例並以邑司承命入拜復承命出答拜今商量邑司官秩多是至卑者緣恐事太輕今請公主左右一人戴鬢帛承拜稱禡將命出入以代邑司官謂得禮之變

唐會要卷六

輟朝編入令式奏

會昌三年八月申書門下

親王公主葬日准德宗以前實錄並合輟朝一日請自今以後准故事處分又京官一品尚書省二品及

時舊相方臻此位比來同刺史曾任監例輟朝一日恐輕重不倫起今後並望輟朝兩日又二王後為國賓又是一品前年方與輟朝請編入令式又駙馬登朝之初例除四品既是國戚不合繫於品秩望輟朝一日

唐會要二十五

禁進士題名局席覆奏

會昌三年十月中書

奉宣旨不欲令及第進士呼有司為座主趨附其門兼題名局席等條流進來者伏以國家設文學之科求貞正之士所宜行敦風俗義本君親然後申於朝廷必為國器豈可懷賞拔之私惠忘教化之根源自

謂門生遂成膠固所以時風寢薄臣節何施樹黨背公靡不由此臣等商量今日已後進士及第任一度參見有司向後不得聚集參謁及於有司宅置宴其曲江大會朝官及題名局席並望勒停緣初獲美名實皆少雋既遇春節難阻良遊三五人自為宴樂並無所禁唯不得聚集同年進士廣為宴會仍委御史臺察訪聞奏謹具如前

唐摭言

進奏官不得兼知兩道奏

會昌四年二月御史臺

準會昌三年十一月十三日勅諸道進奏官或有一人兼知四五道奏進者兼並貨殖頗是倖門因緣交

通爲弊日甚向後兼知不得過兩道以上者各委本  
道速差替聞奏仍委臺司糾察如有違犯必議重懲  
又兼知三四道者臺司檢勘各牒本道準勅差替訖  
切慮改名補職不離一家元是本身虛立名姓伏請  
從已後如知兩道奏進外一家之內父子兄弟更不  
得知諸道奏進如有違犯臺司準前察訪唐會要七十九  
三元日斷屠奏會昌四年四月  
月中書門下  
正月五月九月斷屠伏以齋月斷屠出於釋氏緣國  
初風俗猶近梁陳卿相大臣頗遵此教又弛禁不一  
只斷屠羊宰殺驢牛其數不少鼓刀者坐獲厚利糾

察者皆受賄財比來人情共知此弊臣等商量正月  
一歲之首萬物生育之初請起元日斷三日每遇列  
聖忌日斷一日國家崇元祖之道竭嚴奉之誠旣以  
廣闡其風卽須參用其教仍望准開元二十二年十  
月二十日勅正月七月十月三元日各斷屠三日餘  
望並停緣斷屠日數旣少法令所宜畫一望委御史  
臺別條流聞奏唐會要四十一

量減州縣佐官奏

會昌四年五  
月中書門下

應諸州縣佐官近令約戶稅多少量減佐官實欲漸  
去冗員以懲尸素今諸道所奏戶滿五千稅滿一萬

不合停減者其類已多又假以當路為詞猶務占惜  
臣等商量當路頓亦不常有若遇大軍頓即權勾當  
所存例多如此望令吏部郎中柳仲郢據元敕額類  
會停減不得許其破除

唐會要  
六十九

刺史限日到任奏

會昌四年八  
月中書門下

比緣向外除授刺史多經半年已上方至本任或稱  
敕牒不到或作故滯留刺史未到前知州官事惟務  
因循不急於治百姓受弊莫不由茲臣等商量自今  
已後敕到南省限兩日內牒本道便令進奏院遞去  
到本道後委觀察使勾當去任一千里內限十日進

發二千里已上限十五日三千里已上限二十日仍  
並勒取便進發不得托以事故別取他路經過刺史  
於先三十箇月為限向後並望以任後計日如有前  
刺史諸道居住未赴闕廷者各委觀察使每季具管  
內有無申臺或憂制及疾癘者並須一一具言臺司  
待諸處報都申中書門下所冀人皆守法朝免遺才

唐會要  
六十九

澤州割屬河陽奏

會昌四年九  
月中書門下

河陽近雖置制土宇猶褊澤州全有太行之險固實  
為東洛之藩垣將務遠圖所宜從便望割屬河陽

唐會

要七

委清強官檢點廢寺奴婢奏

會昌五年四月  
中書門下

天下諸寺奴婢江淮人數至多其間有寺已破廢全無僧眾奴婢既無衣食皆自營生或聞洪潭管內人數倍一千人已下五百人已上處計必不少臣等商量且望各委本道觀察使差清強官與本州刺史縣令同點檢具見在口數及老弱嬰孩並須一一分析聞奏如先自營生及已輸納者亦別項分析深恐無良吏及富豪商人百姓綱維潛計會藏隱事須稍峻法令如有犯者便以奴婢計估當二十千已上並處

極法官人及衣冠奏聽進止如有人糾告便以奴婢充賞待勘知人數續具條流其京城委功德使亦准此條流仍具數奏聞

唐會要  
八十六

銅像送官奏

會昌五年七月  
中書門下

天下士庶之家所有銅像并限勅到一月內送官如違此限並准鹽鐵使舊禁銅條件處分其土木等像並不禁所由不得因此擾人其京城及畿內諸縣衣冠百姓家有銅像並望送納京兆府自拆寺以來應有銅像等衣冠百姓家收得亦限一月內陳首送納如輒有隱藏並准舊條處分

唐會要  
四十九

僧尼繫主客奏

會昌五年七月  
中書門下

奉宣僧尼不隸祠部合繫屬主客與復合令鴻臚寺  
收管宜分析奏來者天下僧尼國朝已來並隸鴻臚  
寺至天寶二年隸祠部臣等據大唐六典祠部掌天  
下宗廟大祭與僧事殊不相及當務根本不合歸尚  
書省屬鴻臚寺亦未允當又據六典主客掌朝貢之  
國七十餘番五天竺國並在數內釋氏出自天竺國  
今陛下以其非中國之教已有釐革僧尼名籍便令  
繫主客不隸祠部及鴻臚寺至為允當

國忌行香上州留寺一所奏

會昌五年七月  
中書門下

天下諸州府寺據令式上州以上並合國忌日集官  
吏行香臣等商量上州已上合行香州各留寺一所  
充國忌日行香列聖真容便移入合留寺中其下州  
寺並合廢毀

唐會要  
四十八

首出藏隱廢寺奴婢奏

會昌五年八月  
中書門下

應天下廢寺放奴婢從良百姓者今聞有細口恐刺  
史已下官人及富豪衣冠商人百姓計會藏隱及量  
與錢物索收勅下後如有此色並仰首出却還父母  
如依前隱藏有人糾告官人已下遠販商人百姓並  
處極法其告事人每一口賞錢一百千便以官錢充

給續徵所犯人填納

唐會要八十六

條流諸道判官員額奏

會昌五年九月  
中書門下

條流諸道判官員額西川本有十二員望留八員節  
 度副使判官掌書記觀察判官支使推官雲南判官  
 巡官淮南河東舊額各除向前職額外淮南留營田  
 判官河東留留守判官幽州淄青舊各有九員望各  
 留七員幽州除向前職額外留盧龍軍節度推官淄  
 青除向前職額外留押新羅渤海兩藩巡官山南東  
 道鄭滑河陽京南汴州昭義鎮州易定鄆州魏博滄  
 州陳許徐州兗海鳳翔山南西道東川涇原邠寧河

中嶺南已上舊各有八員望各留六員節度副使判  
 官掌書記推官觀察判官支使振武靈夏益州鄜坊  
 舊各有八員緣邊土地貧望各留五員節度副使判  
 官掌書記推官觀察判官浙東浙西宣歙湖南江西  
 鄂岳福建以上舊各有六員望各留五員團練副使  
 判官觀察判官支使推官黔中舊有十員望各留六  
 員經略副使判官招討判官觀察判官度支鹽鐵判  
 官東都留守陝府舊有五員並望不減天德舊有三  
 員亦望不減同州舊有四員商州兩員並望不減防  
 禦副使華州泗州各有兩員並望不減楚州壽州各



有三員壽州望減團練副使一員楚州望減營田巡  
官一員汝州鹽州隴州舊各有一員望不減桂管舊  
有六員望減防禦巡官一員容管舊有五員望減招  
討巡官一員延州舊有兩員亦望減防禦推官一員  
樓煩龍陂舊各有兩員望各減巡官一員右奉聖旨  
令商量減諸道判官約以六員爲額者臣等商量頃  
據舊額多少難於一切停減今據本鎮額量減數亦  
非少仍望令正職外不得更置攝職仍令御史臺及  
出使郎官御史專加察訪

唐會要  
七十九

